

經

持世經

常

C40
4514
51



C40-4514

了翁上座請大猷及有  
家書置之武州紫雲山  
我微笑塔院廡府中未  
為學者不敢許出院內  
富山二世鐵牛機謹誌



B 64853

持世經卷第一

一名佛說  
法華品經

姚秦三藏法師鳩摩羅什譯

四利品第一

如是我聞一時佛在王舍城迦蘭陀竹園與大比丘  
僧俱爾時世尊與若干百千萬眾恭敬圍遶而為說  
法會中有菩薩摩訶薩名曰持世為諸菩薩摩訶薩  
無量功德莊嚴發心欲善知一切法決定彼岸欲善  
知發無量願具足無量莊嚴欲通達無量諸法決定  
相欲發無量莊嚴願深心所行清淨欲善知清淨具  
足布施欲善知畢定清淨持戒欲善知具足忍辱

經

持世經卷一

一

卷一

輒之心欲善知清淨精進欲善知清淨禪定欲善知  
通達般若波羅密彼岸以如是等無量功德故從座  
而起偏袒右肩合掌向佛白言世尊我欲問佛爲利  
益安樂一切衆生及諸菩薩摩訶薩不斷佛種者具  
足威儀行處不著持戒具足清淨戒受行大法善知  
持無量行處道法爲是諸菩薩故我今問佛世尊云  
何菩薩摩訶薩能善知諸法實相亦善分別諸法之  
相亦能得念力亦善分別一切法章句慧亦轉身成  
就不斷念乃至得阿耨多羅三藐三菩提爾時世尊  
告持世菩薩言善哉善哉持世汝能爲諸菩薩摩訶

薩故問如來是事當知汝則多所安隱衆生憐愍世  
間利益安樂諸天世人亦爲今世後世諸菩薩等作  
大光明汝之功德不可限量能問如來如是之事汝  
必欲斷一切衆生之疑愛護一切衆生爲作光明欲  
示衆生義利欲令衆生得度險道欲爲衆生作歸作  
舍作洲作救欲拔三惡道衆生欲置衆生於無上道  
欲脫衆生生老病死憂悲苦惱欲與衆生無上涅槃  
之樂汝欲於後世守護正法於後恐怖惡世欲度衆  
生持世汝今諦聽善思念之吾當爲汝解說此事唯  
然世尊佛告持世諸菩薩摩訶薩見四利故勤修習

諸法實相亦善分別諸法之相何等四當得具足念當得不斷念當以安慧而自增長念常在心持世是爲諸菩薩摩訶薩見四利故勤修習諸法實相亦善分別諸法之相持世諸菩薩摩訶薩復見四利勤修習諸法實相亦善分別諸法之相何等四當善知決定諸法義當善知諸法義當善知諸法種種因緣當善入諸法如實門是爲四持世諸菩薩摩訶薩復見四利勤修習諸法實相亦善分別諸法之相何等四當善知無量法相當修習善知決定無量法當行無量功德而自增長當知見諸法生滅相是爲四持世

諸菩薩摩訶薩復見四利勤修習諸法實相亦善分別諸法之相何等四當近阿耨多羅三藐三菩提當疾具足助菩提法當不隨他語善知諸法方便故當善知一切智慧持世是爲諸菩薩摩訶薩見四利故勤修習諸法實相亦善分別諸法之相持世諸菩薩摩訶薩復有四利法勤修習諸法實相亦善分別諸法之相何等四爲利益衆生故心無慳垢常行清淨戒安住毗梨耶波羅密故發行精進不休不息正思惟故善行般若波羅密是爲四持世諸菩薩摩訶薩復有四法勤修習諸法實相亦善分別諸法之相何

等四成就具足深心淨願成就具足清淨所行功德  
安住柔和忍辱功德得分別諸法實相光明是爲四  
持世諸菩薩摩訶薩復有四法勤修習諸法實相亦  
善分別諸法之相何等四以大欲求一切智慧善知  
分別禪定解脫諸三昧而生大欲得大慈悲喜捨心  
故方便行清淨行處善修習決定義是爲四持世諸  
菩薩摩訶薩復有四法勤修習諸法實相亦善分別  
諸法之相何等四具足慧行亦求清淨智行處樂無  
礙智亦常不離一切智慧之願持世是爲諸菩薩摩  
訶薩有四法勤修習諸法實相亦善分別諸法之相

持世諸菩薩摩訶薩見四利能求念力何等四當修  
習具足念根當行安慧當具足不斷念當修習具足  
四念處是爲四持世諸菩薩摩訶薩復見四利能求  
念力何等四具足諸助菩提法故念常在心以利念  
根善知修習宿命具足清淨智慧故當疾得不斷念  
當種一切智慧因緣是爲四持世諸菩薩摩訶薩復  
見四利能求念力何等四當修習具足思惟方便當  
修習如實智慧當發勤精進得諸佛法故當不忘憶  
念得不斷念力故持世是爲諸菩薩摩訶薩見四利  
故能求念力持世諸菩薩摩訶薩有四法名得念力

何等四念安慧故常勤精進不休不息常一其心得  
諸法實相故常不放棄正憶念諸法故常護諸根正  
思惟故是爲四持世諸菩薩摩訶薩復有四法名得  
念力何等四安住清淨持戒成就清淨威儀行處除  
去心中五蓋心不爲世法所染離業障煩惱障是爲  
四持世諸菩薩摩訶薩復有四法名得念力何等四  
以不散心求善法勤修習一心相善知正入諸法門  
不樂憒鬧遠離在家是爲四持世諸菩薩摩訶薩復  
有四法名得念力何等四親近善知識常修習深法  
常樂至諸佛菩薩所常樂請問修習智慧持世是爲

諸菩薩摩訶薩有四法名得念力持世諸菩薩摩訶  
薩見四利能修習一切法分別章句慧何等四當善  
知一切諸法實相當分別一切法所因當知諸法決  
定義當善知一切法語言章句是爲四持世諸菩薩  
摩訶薩復見四利能修習一切法分別章句慧何等  
四當善知諸法隨宜次第當善知一切法因緣方便  
當具足修習一切法方便當分別知了義未了義經  
是爲四持世諸菩薩摩訶薩復見四法利能修習一  
切法分別章句慧何等四當善學是道是非道慧當  
得一切法義說力當疾得清淨智慧行處當具足修

智波羅密持世是爲諸菩薩摩訶薩見四法利能修  
習一切法分別章句慧持世諸菩薩摩訶薩復有四  
法能修習一切法分別章句慧何等四善知修習諸  
法集相善知諸法因相善知諸法緣相能入因緣方  
便是爲四持世諸菩薩摩訶薩復有四法能修習一  
切法分別章句慧何等四善知諸法苦善知諸法集  
善知諸法滅善知諸法滅道是爲四持世諸菩薩摩  
訶薩復有四法能修習一切法分別章句慧何等四  
善知諸法合散方便得先因力善知諸法所宜善知  
分別文字章句是爲四持世諸菩薩摩訶薩復有四

法能修習一切法分別章句慧何等四善知不了義  
經於了義經中不隨他語善知一切法相印亦善安  
住一切法無相智中持世是爲諸菩薩有四法能修  
習一切法分別章句慧持世諸菩薩摩訶薩復有四  
法轉身常得不斷念乃至得阿耨多羅三藐三菩提  
何等四明了善不善法成就第一念安慧能離五蓋  
心終不忘念阿耨多羅三藐三菩提心是爲四持世  
諸菩薩摩訶薩復有四法轉身常得不斷念乃至得  
阿耨多羅三藐三菩提何等四善修習四念處善修  
習學分別慧於諸禪定智慧爲首於決定智慧印得

通達是爲四持世諸菩薩摩訶薩復有四法轉身常  
得不斷念乃至得阿耨多羅三藐三菩提何等四得  
諸陀羅尼門亦修習無生智入於盡智亦觀於滅智  
是爲四持世諸菩薩摩訶薩復有四法轉身常得不  
斷念乃至得阿耨多羅三藐三菩提心何等四斷於  
愛恚不貪著一切有爲無爲法心通達無爲智慧至  
如來所行處持世是爲諸菩薩摩訶薩有四法轉身  
常得不斷念乃至得阿耨多羅三藐三菩提心持世  
諸菩薩摩訶薩有五淨智力皆具足能得如上功德  
何等五深心淨智力願淨智力善根淨智力迴向淨

智力障業淨智力是爲五持世諸菩薩摩訶薩復有  
五淨智力皆能具足得如上功德何等五威儀行處  
淨智力念具足淨智力方便淨智力緣衆生淨智力  
緣相淨智力是爲五持世諸菩薩摩訶薩復有五淨  
智力皆具足得如上功德何等五捨心淨智力利益  
衆生淨智力生大慈淨智力生大悲淨智力生大  
大捨淨智力是爲五持世諸菩薩摩訶薩復有五淨  
智力皆能具足得如上功德何等五持戒淨智力不  
著持戒淨智力忍辱淨智力不著忍辱淨智力多聞  
淨智力是爲五持世諸菩薩摩訶薩復有五淨智力

皆能具足得如上功德何等五深精進淨智力受精  
進淨智力禪定淨智力禪定方便淨智力止觀方便  
淨智力是爲五持世諸菩薩摩訶薩復有五淨智力  
皆能具足得如上功德何等五慧淨智力多聞決定  
方便淨智力世間出世間淨智力慧方便淨智力有  
爲無爲淨智力是爲五持世諸菩薩摩訶薩復有五  
淨智力皆能具足得如上功德何等五觀方便淨智  
力明解脫淨智力無生相淨智力一相無相淨智力  
第一義世諦義淨智力持世是爲諸菩薩摩訶薩有  
是五淨智力疾得具足如是一切功德持世以是利

故諸菩薩摩訶薩於是淨智力中應勤修習持世諸  
菩薩摩訶薩成就三法於是淨智力中能勤修習何  
等三一者欲二者精進三者不放棄諸菩薩摩訶薩  
成就此三法能於是具足一切功德淨智力中能勤  
修習何以故持世欲精進不放棄皆是一切法根本  
諸菩薩摩訶薩得是淨智力能疾得一切智亦名爲  
精進不退者亦名不退法者亦以此功德疾得增長  
亦於一切法中疾得淨智力持世若有人如是一切  
法中得清淨智力者是爲世間福田是人次我能消  
供養是人能至如來行處是人能觀如來法是人不

久能證如來智慧持世我本無量阿僧祇劫行菩薩道時然燈佛與我授記汝過阿僧祇劫當得作佛卽時徧知如是淨智力持世若有人於一切法中能成就如是淨智力者是人亦當得阿耨多羅三藐三菩提如我今得是人亦轉法輪如我今轉是人亦師子吼如我今師子吼是人亦如是自然於一切法中得自在力如我今也持世汝等於此淨智力中當勤精進不以自然具足一切智慧持世過去無量阿僧祇劫有佛號智高王如來應正遍知明行足善逝世間解無上士調御丈夫天人師佛世尊持世是智高王

如來有無量聲聞僧亦有無量諸菩薩僧是佛本願因緣所致是智高王佛土無三惡道其諸衆生不覺有苦畢竟具足安隱快樂離欲者多能障五蓋是諸衆生成就如是清淨快樂如人入第四禪樂是智高王佛壽六百萬億那由他劫持世是時國土惟佛爲王更無有王國土衆生皆號佛爲法王是智高王佛多爲諸菩薩說是斷一切衆生疑喜一切衆生心菩薩藏經爾時有五百菩薩聞是諸菩薩淨智力發如是精進力盡形不生坐心盡形不生衣服想盡形不生我想衆生想入想男女想盡形終不多食但修習

如是淨智力勤行精進五百菩薩以是善根因緣命終皆生過東方十萬億國土既生不久修習是法故得識宿命成就利根其國土佛號無量華積王現在說法其諸菩薩始年十六於無量華積王佛所出家六十億歲行童子梵行亦修行如是精進持世是五百菩薩得值如是等二十億佛於諸佛所勤行精進成就第一念安慧末後值無量力高王佛與其授記過萬劫已當得阿耨多羅三藐三菩提是五百人於萬劫中得值二萬億佛具足佛道於一劫中次第得阿耨多羅三藐三菩提持世當知菩薩摩訶薩疾欲

得阿耨多羅三藐三菩提者於是淨智力中應生欲精進不放逸何以故持世諸佛阿耨多羅三藐三菩提皆以欲精進不放逸爲根本及餘助道法能具足佛法者持世我以如是精進得值二十億佛於諸法中世世成就念力世世得識宿命修習是法不休不息我終不失是欲精進不放逸我常成就欲精進不放逸爾時世尊以大慈悲心顧視四方現神通力使三千大千世界諸閻浮提皆有化佛爲諸衆生說是斷一切衆生疑喜一切衆生心菩薩藏經復以神力令竹園中在會大衆皆見諸佛遍閻浮提各各說法

大衆咸悅從座而起皆俱禮佛作是言希有世尊諸佛如來神力不可思議成就無量不可思議法爾時佛告大衆諸善男子如來是事未足爲難所以者何如來善能通達法性故若一毛孔出神通力光明普照十方恒河沙世界演出法音於一毛孔百千萬億分未盡其一如來成就如是不可思議功德諸善男子如來深觀衆生心而爲說法諸善男子今世衆生少有於是法中能行欲諸善男子今世衆生少有於是法中能行精進諸善男子今世衆生少有於是法中能行不放逸何以故如來今出五濁惡世所謂衆

生濁見濁命濁煩惱濁劫濁諸善男子若有乃至一人能信受如是甚深清淨法能至佛慧是爲希有何況能信解如來所行諸善男子我常長夜莊嚴如是願如是精進忍辱行爲苦惱衆生無救護者無依止者多墮惡道者我於爾時當成佛道利益無量阿僧祇衆生諸善男子當知如來恩力本清淨願精進故能令無量阿僧祇衆生信解受持如是深法諸善男子我於先世教化衆生是諸衆生能解我法諸善男子今佛以十力四無所畏少能令衆生信解如是甚深之法若有衆生住是法中者皆是如來恩力方便

故我長夜不離如是深法我亦長夜大悲大喜  
大捨攝取衆生少有如來出五濁世利益衆生何以  
故諸善男子我於先世以大精進力大方便力教化  
衆生習是阿耨多羅三藐三菩提諸善男子我念過  
世一日之中捨千身布施利益衆生諸善男子我於  
若干千萬世見飢餓衆生故自割身肉煮以與之我  
於爾時心無憂悔但於衆生普行大悲諸善男子當  
知我如是大精進大方便力教化衆生習是阿耨多  
羅三藐三菩提是故諸善男子應發如是欲精進不  
放逸修習阿耨多羅三藐三菩提如我行菩薩道時

汝等亦當如我利益教化衆生諸善男子是賢劫中  
諸佛出世無不讚我作如是言釋迦牟尼佛深行精  
進如是釋迦牟尼佛具足精進如是釋迦牟尼佛具  
足精進波羅蜜如是釋迦牟尼佛行菩薩道時教化  
衆生如是出於五濁利益無量阿僧祇衆生諸善男  
子如是行道故應勤生欲精進不放逸諸善男子我  
今雖得阿耨多羅三藐三菩提精進猶不休息至涅槃  
時猶發精進碎身骨如芥子解散支節何以故憐  
愍未來世衆生故我先世行菩薩道時所化衆生或  
行有錯謬墮諸難處欲免濟之起大悲心分布舍利

乃至如芥子皆與神力我滅度後若有衆生應以舍利度者心得清淨心得清淨已處處地中隨願成就諸善男子我先世行道時於衆生中成就如是悲心碎身舍利普使分布是我本願我以如是無量福德因緣大悲心故於後惡世普覆衆生諸善男子若諸菩薩於此法中能生欲精進不放逸必發是願於後末世受持讀誦爲人廣說如是等經我當以神力令諸菩薩受持讀誦爲人廣說我亦以如是等經囑累是諸菩薩以其能受持讀誦爲人廣說故所以者何諸善男子隨是經所住當知其土有佛不滅是故如

來以是經囑累諸菩薩諸善男子當知我宿世以如是因緣攝取衆生今世亦復攝取衆生後世亦復攝取衆生所謂護念如是經法於後五百歲普流布故諸善男子若於今世若我滅後聚落城邑山林曠野有如是等經有能受持讀誦爲人解說當知此中則爲有佛何以故以是因緣我說諸佛卽是法身以見法故則爲見佛佛不應以色身見若人信法聽法是人則爲信佛亦聽佛語若人於此法中能如是修行是人則爲見佛是人名爲實語者法語者隨法行者諸善男子我身非法非非法是名隨法行是名第一

法施所謂不貪著法不貪著非法何以故若貪著法者不名見佛諸善男子不貪一切法名爲見佛若於一切法中無所見者是名見佛何以故如來不可以法說不可以非法說亦不可以法見所以者何諸善男子如經中說汝等比丘若知我法如筏喻者法尚應捨何況非法若能捨法非法是名見佛何以故如來名爲捨一切法者不貪不受諸法名字不墮名字法中何況墮非法名字中諸善男子捨離一切法名字名爲如來能如是見者名爲見如來何以故捨離見一切法故名爲見如來以一切法不可得故如實

知見一切法故名爲見如來諸善男子若一切法不可得捨離一切法是中卽無戲論是法是非法名字無行無示是名見如來若人能如是見法者是名見如來若能如是見如來者是名正見若異見者名爲邪見若邪見者則爲妄見是人不能爲真見諸善男子真見者斷一切語言道非真非妄非有非無離一切法不取一切法不得一切法如是見者名爲見如來何以故諸善男子如來不以法性見見一切法性離者名爲如來若能如是見者名爲正見諸善男子汝等應如是見如來汝等且觀如我所說觀於如來

如是觀者當知一切法皆是如來當得一切法如當  
得一切法實相當得一切法非虛妄相當知一切法  
是如來法當知一切法是如來所行處當知一切法  
是不可思議行處諸善男子是故我說一切法是如  
來行處如來行處是無行處何以故一切法行處是  
中無法可行是故說無行處是如來行處一切法行  
處卽是無行處無行處卽是如來行處何以故一切  
法行處無所有故無行處是如來行處一切行處入  
如來行處則非行處如來通達證是法故是名無行  
處是如來行處諸善男子能知一切法無行處是人

能入如來行處是人能觀如來行處是人能求如來  
行處是人亦不貪著如來行處何以故是人知無行  
處是如來行處離行處是如來行處所謂一切法不  
可得不可分別不可貪故是名非行處是如來行處  
是名入智行處不入一切法故何以故一切法無門  
故以是門入諸善男子一切法無入無出無形所以  
者何如來於法無所得何法若出若入若見若說諸  
善男子是名入一切法門以不入相故一切法無合  
無散無縛無解是一切法門以無門故說是門名爲  
不可出門不可入門不可歸門不可說門畢竟無生

門以是法門於法無所知無所見以是法門於法無證無所入何以故諸善男子一切法無門門不可得故虛空是一切法門從本已來性清淨故無斷是一切法門斷無所有故無邊是一切法門邊不可得故無量是一切法門量不可得故無際是一切法門諸際無所有故諸善男子若有善男子善女人能入是法門者則入一切法門則知一切法門則說一切法門

五陰品第二之一

爾時佛告持世菩薩持世若諸菩薩摩訶薩欲得一

切法實相亦善分別說法之相若欲得念力若欲得一切法分別慧若欲轉身具足得不斷念乃至得阿耨多羅三藐三菩提者當疾入如是法門於是法門得智慧光明何以故於是法中疾得具足故又復持世諸菩薩摩訶薩勤修習如是法門入是法方便門能得分別陰方便界方便入方便因緣生法方便四念處方便五根方便八聖道分方便世間出世間法方便分別有爲無爲法方便持世何謂菩薩分別五陰方便諸菩薩摩訶薩正觀五取陰所謂無明陰是五取陰苦陰是五取陰癡陰是五取陰病陰癱陰如

箭入身陰是五取陰諸菩薩分別觀擇色取陰云何  
爲分別觀擇色取陰是色取陰從四大生假名爲色  
取陰是色陰無有自性但以四大和合假名爲色陰  
色陰無有作者無使作者無作無起無出名爲色陰  
但以先業因緣四大所攝數名色陰非陰是色陰譬  
如虛空陰實無生相若說虛空陰是中無有法生但  
有名字故名爲虛空陰凡夫於此無陰陰想以顛倒  
心故無實實想貪著我五陰我所五陰我色陰我所  
色陰如是貪著是諸凡夫貪著色已於色中依止我  
我所有色受色取色著色依色受行種種惡不善業

我等不應隨凡夫學我等應勤修習助菩提法今應  
正觀色陰諸菩薩正觀色陰時知同水沫聚云何知  
同水沫聚無聚是水沫聚但從衆緣生不可執捉無  
有堅牢水沫聚中無有聚相無聚是水沫聚色陰亦  
如是色陰中無有陰相諸菩薩如是觀時作是念凡  
夫不能正觀虛妄色不能如實知色無常不能如實  
知色相我等入正道不應貪著虛妄不應貪著色何  
以故色是不可貪著相色但有名字無決定相當觀  
是色無決定相離名字故名之爲色又說色名惱壞  
相智者通達知是無相我等應當善知修習色無相

方便不貪著色相若人貪著色相卽貪著色我等應善知入色相諸菩薩如是正觀時如實觀擇色是色陰皆從凡夫憶想分別起若法從憶想分別起卽是不生一切憶想分別皆非真實凡夫依止顛倒所起色爲色所縛爲色所害往來苦惱無明癡闇故貪色不捨見色有常堅固是凡夫人爲色縛色所縛故往來地獄畜生餓鬼天人深貪色味不觀色中有諸過惡我等不應隨凡夫學應當觀擇分別修習色方便分別觀擇色時見色性如夢譬如夢中色皆從憶想分別覺觀起曾所見聞覺知因緣起是夢中亦知彼

我亦見地水火風亦見山河叢林夢中色相無有決定但以憶想故有色陰相亦如是從先世業因緣出無有決定性諸菩薩如是思惟不取色若我若我所但正觀色如實無常相虛妄顛倒衆生顛倒貪著取色若我色若我所色若彼色若彼所色如是正觀擇色時不得色不見色性亦不貪著色無常菩薩爾時若於色中愛念貪著皆悉除斷善知色正相善知色平等相善知色滅相善知色滅道相善知色陰無所從來去無所至作是念是身色陰皆從業果報覺觀起四大所攝是身色陰非我非彼無有所屬無所從

起觀色陰如是內色不貪不受外色不貪不受過去色不貪不受未來色不貪不受現在色不貪不受即知一切色陰是無生相是菩薩爾時不滅色亦不求滅色法持世諸菩薩摩訶薩觀擇色取陰如是持世何謂菩薩摩訶薩觀擇受取陰菩薩作是思惟是苦受樂受不苦不樂受皆從因緣生屬諸因緣入受相中此中無有受者但以貪著故貪著即是不真虛妄從憶想分別起是菩薩如是思惟時作是念是凡夫爲虛妄受所縛爲三受所害所謂苦樂不苦不樂受是凡夫若受樂爲愛結所使以愛結所使故能起惡

業若受苦爲恚結所使以恚結所使故起諸惡業若受不苦不樂受爲無明結所使是人因無明結所使故不脫憂悲苦惱我等今不應隨凡夫學應正觀諸法我等應如實觀諸受諸菩薩如實觀受陰作是念非陰是受陰從憶想分別起顛倒相應無有受者但從先世業因今世緣故受諸受自性空受中無有受相諸菩薩觀達受陰譬如雨滴水泡有生有滅無有決定受陰亦如是次第因緣起屬諸因緣無有住時虛妄不實從憶想顛倒相應起諸菩薩爾時作是念凡夫可愍爲諸受所制以不正觀受陰故得樂受生

著得苦受亦生著得不苦不樂受亦生著爲諸受所  
縛馳走往來從身至身受結所縛輪轉五道無有休  
息是凡夫著於諸受爲受所制爲受所繫不脫受陰  
於受陰所不見出處不知正觀受陰故不知如實觀  
受陰無常於受陰中爲欲染所縛不知受陰如實相  
我等今不應隨凡夫學應如實觀擇受陰卽時如實  
觀受陰無陰是受陰不真陰是受陰顛倒陰是受陰  
不住陰是受陰是時見受陰如實相無有作者無有  
使作者於受陰中不見受陰相如是觀受陰不見受  
陰在內不見受陰在外不著受我不著受彼知受陰

無所從來無有所屬無法能生受者但從顛倒相應  
先世業果報數名受陰見受陰虛妄因緣相續行爾  
時過去受陰不受不貪不著未來受陰亦不受不貪  
不著現在受陰亦不受不貪不著是人於樂受中除  
却愛結苦受中除却悲結不苦不樂受中知見無明  
結故勤行精進菩薩爾時若受樂受心不生愛若受  
苦受心不生悲若受不苦不樂受心不生癡持世凡  
夫多於樂受生愛受苦受生悲不苦不樂受生癡是諸  
凡夫以愛悲癡故深入闇冥不能如實知受陰亦不  
知愛悲癡相深貪著愛悲癡所謂是我我所是此彼

等持世諸菩薩摩訶薩於此中正觀受陰者不爲愛  
恚癡所牽若生愛恚癡卽能除斷行於正道於樂受  
中斷愛結使故勤精進於苦受中斷恚結使故勤精  
進於不苦不樂受中斷癡結使故勤精進如實知三  
受相爾時有所受若苦若樂若不苦不樂皆離不著  
離愛結使離恚結使離癡結使諸受起時皆能知見  
受陰如實知受陰如實無常若能如是知已於受陰  
中欲染悉斷入斷受陰欲染道中不爲諸受所汙是  
諸菩薩若如是正觀受陰如實知受陰知受陰集受  
陰滅受陰滅道然後如實知受陰是無生相以無生

相通達受陰無相持世諸菩薩摩訶薩觀擇受陰如  
是持世何謂諸菩薩摩訶薩觀擇想陰諸菩薩摩訶  
薩正觀想陰時見想陰皆從顛倒起虛妄不堅不實  
從本已來不生相以因緣和合從先世業力起作是  
念非陰是想陰虛妄陰是想陰顛倒陰是想陰想陰  
中無想陰相譬如春後日焰以名字故說名爲焰隨  
想陰亦如是以識相故說名想陰凡夫於此爲虛妄  
想所繫或識樂或識苦或識不苦不樂或識寒熱或  
識男女或識五道生死或識合或識散或識過去或  
識未來或識現在或識好或識醜或識有或識無是

識凡夫想皆爲顛倒虛妄屬諸因緣但有假名爲想陰此中若內若外無有想者凡夫人虛妄想所繫故或識貪欲或識瞋恚或識愚癡或識妻子凡夫依止是想陰貪著虛妄以是想陰馳走往來不能如實觀想陰是虛妄凡夫以我相彼相男女相繫於想陰不能得脫貪著想陰我是想陰我所以是想陰我等不應隨凡夫學諸菩薩摩訶薩如是正觀想陰想陰中想陰相不可得如焰陰中焰陰相不可得菩薩見想陰如焰性過去想陰不貪不受不著未來想陰亦不貪不受不著見現在想陰不任不分別若我若彼卽行

滅想受陰道通達想陰是無生不見想陰若來處若去處但以顛倒相應先世業因所起現在緣所繫無陰是想陰觀擇想陰無所從來去無所至卽通達想陰無生亦不分別想陰滅但爲滅一切想受陰故亦任如實知見故菩薩如實觀想陰時遠離一切想道心亦不任一切想道但任知見想陰故隨如實想陰不貪著想陰如實觀擇一切想陰如實知想陰集滅盡持世諸菩薩摩訶薩如是正觀擇想陰則離想陰欲染亦能行斷想陰欲染道

持世經卷第一

釋

於容泡匹交切水上浮漚也

虛世謂善惡事... 不貪善惡... 公衣不... 吾收實... 勿為... 勿受...

持世經卷第二

姚秦三藏法師鳩摩羅什譯

五陰品第二之二

持世何謂菩薩摩訶薩觀擇行陰持世諸菩薩摩訶薩觀行陰從顛倒起虛妄憶想分別假借若有菩薩爾時若身行口行意行皆觀不淨無常苦空無我如是觀時作是念非陰是行陰苦陰是行陰衆因緣生陰是行陰像陰是行陰諸行陰無增無減無集身行口行意行無有作者智者不貪受是行陰所以者何是諸身行不在身內不在身外不在中間口行意行

亦復如是不在意內不在意外不在中間行陰中無  
行陰相何以故是行陰從衆因緣顛倒起虛妄不真  
先業果報所攝亦今因緣所繫能有所行諸有所行  
若身行若口行若意行皆非真行無所有行虛妄行  
顛倒行是故說非陰是行陰何以故智者不決定得  
行陰相是身行是口行是意行此處彼處若內若外  
又身口意行尚無決定行相可得可說何況行陰可  
得可說是故說無陰是行陰凡夫起顛倒想貪著身  
口意行憶念分別是行陰爲行陰所縛馳走往來凡  
夫以顛倒故起身口意行起已貪著歸趣無法生法

想無陰生陰想貪著顛倒行故爲行陰所繫往來五  
道常隨身口意行不能如實觀身口意行不能如實  
觀行陰故以身口意業而起諸行是諸凡夫著顛倒  
故著不真法故著虛妄故數名行陰持世諸菩薩於  
此中如是正觀諸行無有根本羸劣無力以衆緣和  
合可說行陰是中無有真實行陰無陰是行陰從本  
已來不生是行陰無性是行陰諸行前際不可得後  
際不可得中際不可得無有住時諸行念念生滅持  
世諸菩薩如是正觀行陰空不可得不堅牢相乃至  
毫釐亦不可得作是念是諸凡夫爲不堅牢法所繫

行陰所繫貪著所縛起身口意行我是行我所是行  
起如是業爲行陰所縛不知行陰性入無明癡冥於  
諸行中生真實想以顛倒故貪著受取行陰是人貪  
著受取行陰故或起樂行或起苦行或起不苦不樂  
行是人起樂行已得樂身起苦行已得苦身起不苦  
不樂行已得不苦不樂身是人得樂身已生愛得苦  
身已生恚得不苦不樂身已生癡是人以愛恚癡故  
不見諸行過惡不能清淨身口意行是人身口意行  
不清淨故墮不清淨道所謂地獄畜生餓鬼或時暫  
得生天人中貪著身口意行深著行陰諸菩薩摩訶

薩應如是正觀今我等不應隨凡夫學我等應清淨  
身口意行不應貪著行陰應觀行陰過惡應求出行  
陰道如是觀者名爲如實正觀行陰亦名正觀行陰  
無常卽時如實觀諸行諸行集諸行滅諸行滅道不  
受不貪不著諸行亦不貪著行陰如是觀時遠離行  
陰相亦行無行陰道卽觀諸行空於一切諸行中驚  
怖生厭離心但起清淨身口意行壞行相故離行陰  
相故是人有所得身皆是清淨何以故是人身業清  
淨口業清淨意業清淨身行清淨口行清淨意行清  
淨是人遠離行陰遠離行陰相壞諸法及根本相如

是正觀時見行陰無所從來去無所至不得諸行決定生相亦不得決定滅相卽觀諸行無生滅相一切諸行亦無生滅是人觀一切諸行無生滅相生默離心正通達諸行集滅相亦不生離證諸行無生相而善通達諸行相何以故持世是行陰無決定相譬如芭蕉堅牢相不可得無堅牢相亦不可得行陰亦是堅牢相不可得無堅牢相亦不可得持世諸菩薩摩訶薩觀擇思惟入行陰如是持世何謂諸菩薩摩訶薩正觀擇識陰諸菩薩摩訶薩觀非陰是識陰顛倒陰是識陰虛妄陰是識陰何以故持世是識陰從

顛倒起虛妄緣所繫從先業有現在緣所繫屬衆因緣虛妄無所有憶想分別起從識而生有所識故名之爲識從憶想分別覺觀生假借而有所識故數名爲識以識諸物故以起心業故以思惟故衆緣生相故起種種思惟故數名識陰從有所識有識像出示心業故攝思惟故數名識陰或名爲心或名爲意或名爲識皆是意業分別故識陰所攝識相識行識性示故數名識陰如是非陰是識陰不生不起不作但以顛倒相應緣虛妄知故數名識陰何以故是識陰從衆因緣生無自性次第相續生念念生滅是識

終不生陰相何以故是識陰生相不可得決定相亦不可得生相不可得故決定相不可得故根本無所有故自相無故堅牢不可得故智者正觀擇通達非陰是識陰凡夫於非識陰生識陰想以覺觀分別憶想顛倒相應虛妄所縛故強名爲識陰貪著是識陰依止所識依止識種示思惟故生起識陰是人種種分別貪著內識貪著外識貪著內外識貪著遠識貪著近識以識相故分別起識陰是人以憶想分別若心若意若識假借強名是心是意是識如是知種種心相生是凡夫貪著識陰爲識陰所縛心意識合故

起種種識陰分別虛妄事故以一相故以決定相故能得是心是意是識能得分別愛著是人依止識陰深貪識故亦得過去識陰貪著念有亦得未來識陰貪著念有亦得現在識陰貪著念有諸凡夫於見聞覺知法中計得識陰貪著念有是人貪著見聞覺知法爲識陰所縛貴其所知以心意識合繫故馳走往來所謂從此世至彼世從彼世至此世皆識陰所縛故不能如實知識陰識陰是虛妄不實顛倒相應因見聞覺知法起此中無有實識者若不能如是實觀或起善識或起不善識或起善不善識是人常隨識

行不知識所生處不知識如實相持世諸菩薩摩訶  
薩於此中如是正觀知識陰從虛妄識起所謂見聞  
覺知法中衆因緣生無法生法想故貪著識陰我等  
不應隨凡夫學今我等當如實正觀擇識如實正觀  
擇識陰是諸菩薩如實觀時知識陰虛妄不實從本  
已來常不生相知非陰是識陰像陰是識陰幻陰是  
識陰譬如幻所化人識不在內亦不在外不在中間  
識性亦如是如幻性虛妄緣生從憶想分別起無有  
實事如機關木人識亦如是從顛倒起虛妄因緣和  
合故有如是觀時知識皆無常苦不淨無我知識相

如幻觀識性如幻菩薩爾時作是念世間甚爲狂癡  
所謂從憶想分別識起於世間與心意識合三界惟  
皆是識是心意識亦無形無方不在法內不在法外  
凡夫爲虛妄相應所縛故於識陰中貪著若我若我  
所是人貪著識陰在內貪著識陰在外貪著識陰在  
內外貪著識陰在彼我是人貴此識陰爲識陰所縛  
受識陰味說識陰相所謂若心若意若識隨味行故  
貪受識陰是人爲識所縛識陰合故爲心意識所牽  
以心意識因緣力故生是凡夫若起下思得下身若  
起上思得上身若起中思得中身是人隨心意識力

經

卷之三

五

常八

經

卷之三

六

常八

故生依止諸入貪著識陰故不脫生老病死憂悲苦惱菩薩於此中如實正觀識陰如實觀識陰無常相故過去識陰不貪不著不念知非陰是識陰未來世識陰亦不貪不著不念知非陰是識陰現在識陰亦不依止如實知識陰無常相如實知識陰生滅相若如是思惟正觀識陰是名正觀入識陰道所謂如實知識如實知識集如實知識滅如實知識滅道是人中實觀識陰集滅相能壞識陰能斷一切相知識陰集滅相亦通達識陰集滅相菩薩爾時亦不生識陰亦不滅識陰是識陰從本已來無生如是觀時不分

別識滅相通達識陰無生相何以故持世是識陰無生無相無成是識陰生性虛妄故入在無生相中持世識陰終不有生滅相是識陰相從衆因緣生持世菩薩摩訶薩如是觀因緣法非陰是識陰觀擇信解證知通達諸所有識悉皆知實菩薩知識實故皆破一切所緣所知持世菩薩摩訶薩如是觀識陰知是識陰無生者無作者無起者無受者無使受者但以衆緣生衆緣合故有緣見聞覺識法故繫有從本已來常畢竟空如是觀識陰時卽知識陰是無作無起相不貪不著持世諸菩薩摩訶薩如是正觀擇入識

陰若菩薩能如是方便入五陰能如是方便正觀五陰是名通達入五陰集滅道皆能斷諸陰相真知五陰方便以是方便故於五取陰中不貪不著不縛不繫如實知色如實知色無常相是菩薩若於色有欲染則能除斷亦如實知受想行識亦如實知受想行識無常相若於受想行識中有欲染則能除斷菩薩於五取陰中除斷欲染故隨順通達決定五陰方便如是觀時能知五取陰微細生滅相持世何謂菩薩摩訶薩能觀擇五取陰微細生滅相者菩薩摩訶薩觀衆生初入胎歌羅邏時先五陰滅卽更有五陰生

從是已來觀五陰生滅相雖先識滅亦知五陰非斷滅相識雖依止歌羅邏亦知五陰不至不常如是觀初入胎一念五取陰生滅相從歌羅邏乃至出生及後增長乃至死時觀此五取陰念念生滅相是五取陰念念生滅如是觀擇五取陰微細生滅相持世是五取陰微細生滅相者所謂先五取陰滅次第無物至胎識初合時五陰卽有生滅因歌羅邏五取陰假名爲人所以者何持世識無所依則不能住識所依者五取陰是持世又無色界諸天五取陰細微生滅相亦應如是知持世如是細微五取陰生滅相辟支

佛智慧所不能及何況聲聞智慧惟諸佛如來善知  
五取陰從初入胎細微生滅相及無色天諸陰念念  
生滅所謂一切智慧出一切世間智慧諸菩薩摩訶  
薩得無生法忍至佛慧境界是人雖如是觀擇五取  
陰細微相從初入胎乃至無色天亦不能究盡如諸  
佛所知持世諸佛如來無有隨他智慧自然得一切  
智慧方便得阿耨多羅三藐三菩提諸佛智慧無所  
不達諸佛無礙智慧於一切法中得決定慧於一切  
法中得自在力何以故於無量無邊千萬億阿僧祇  
劫行於深法故持世一切凡夫不能如是方便觀五

取陰何況觀五取陰細微生滅相何以故諸凡夫人  
不能知五取陰不能知五取陰如實凡夫不知取不  
知取陰持世何謂爲取取名我取衆生取見取戒取  
五陰取十八性取十二因緣取是名爲取乃至所有  
法若內若外所謂欲取有取見聞覺識取我我所取  
持世凡夫於此虛妄取不知不見顛倒因緣而取諸  
法是人爲取所繫無明因緣取諸行諸行因緣取識  
識因緣取名色名色麤相衆生染著歸趣所謂色取  
色合色縛及取四無色陰受想行識分別爲名持世  
若無諸佛衆生則無所知無所見不能正觀五取陰

諸佛出於世間壞衆生依止色壞依止受想行識壞和合一相故諸佛如來作如是分別說汝等所依所歸是名爲色是色但以四大和合受想行識但有名字名色相成就故說五取陰汝等衆生莫貪歸此不堅牢五取陰持世如來何故說五取陰持世是凡夫人從顛倒生入無明網馳走往來何所歸趣貪受五取陰相作是念我依止此當以得樂是人以是樂相貪歸五陰以苦相以不苦不樂想貪歸五陰凡夫人所歸所依止處是名五陰持世諸凡夫人從生而盲不知五陰爲是何等不知五陰從何所來不知五陰

如實故貪受五陰是故說名取陰於此中誰有取者此中取者不可得但以顛倒貪著分別虛妄自縛無明癡闇故取我取我所取此取彼是故說取陰是五陰無有取者亦無決定相是故智者知非陰是五取陰顛倒陰是五取陰無明陰是五取陰凡夫於此爲所繫縛貪歸五取陰以貪歸故不知何等是取何等是取陰但爲貪著所歸五陰往來生死貪著是五陰故馳走諸趣貪歸何等貪歸見貪歸聞貪歸覺貪歸識貪歸愛貪歸無明是諸凡夫爲愛縛所縛貪愛五取陰爲諸蓋所覆入無明闇冥不知不覺我等今爲

貪歸何處繫縛何處以不知故往來地獄畜生餓鬼  
人天道中生死所縛貪歸生死不放不捨不斷五陰  
亦不能知五陰如實相不如實知故爲種種苦惱所  
害墮虛空獄不知出處是不見出道故於無始生  
死道中受諸生死是故不能得脫生死老病死憂悲苦  
惱亦不得度無量生死險道亦不得脫諸大苦聚還  
復歸趣於苦貪著於苦爲苦所使何等爲苦五取陰  
是生時但苦生滅時但苦滅持世我以是因緣故爲  
弟子說法汝等比丘當正觀色陰亦當如實知色無  
常相汝等若於色中有欲染者當疾除斷汝等當正

觀受想行識亦當如實知受想行識無常相若於受  
想行識中有欲染者當疾除斷除斷欲染故心得正  
解脫持世若有人知我所說法義如是能如說修行  
當得脫生死老病死憂悲苦惱若人不能如說修行爲  
色縛所縛爲愛繫所繫入無明闇冥貪取五陰是人  
貪取五陰故不能得脫生死險道持世以是義故說  
世間與我諍我不與世間諍何等爲世間所謂貪著  
五取陰者爲世間所攝是人貪歸五陰爲五陰所縛  
不知五陰性不知五陰空相而與我諍是人違逆佛  
語與佛共諍故墮大衰惱若有人於佛在世若佛滅

後能如是觀虛妄五取陰空無所有從顛倒無明闇  
冥起虛誑妄想但誑凡夫非五陰似五陰如是之人  
不與佛諍不逆佛語故得脫地獄畜生餓鬼苦惱持  
世諸佛不與人諍斷一切諍訟名之爲佛但爲衆生  
演說實法作是言汝等先所取者皆是顛倒一切衆  
生顛倒力故貪歸五陰往來世間是人貪歸五陰已  
貪起種種邪見貪歸種種名字貪歸種種憂悲苦惱  
是人爲種種邪見煩惱種種憂悲苦惱之所殘害無  
有能爲作救作舍作歸作趣惟佛能救凡夫小心少  
智慧故貪嗜五欲依止多過五陰是凡夫人與救者

歸者依者脫一切苦惱者而共諍訟持世我今舉手  
其有見五陰者見五陰相者貪五陰者我則不與是  
人爲師如是之人非我弟子不隨我出家不隨我行  
不歸依我是人入於邪道入虛妄道取不實者是爲  
顛倒不知佛意不知佛隨宜說五陰不知佛第一義  
是人不受佛教不應受供養而受是人我尚不聽出  
家何況當得受人供養何以故如是之人是外道徒  
黨所謂生五陰相者貪著歸趣五陰者持世當來之  
世後五百歲法欲滅時於我法中出家多是生五陰  
相者決定說五陰相深貪著五陰入虛妄邪道於我

法中而得出家袈裟繞牀常樂往來白衣居家當知是人與外道無異亦以我法多爲衆人恭敬供養持世我說是見五陰者決定說五陰者貪著五陰者不聽受人一杯之水所以者何是人於我法中乃至無有柔順法忍是人違逆我法背捨聖行持世是故諸菩薩摩訶薩於後惡世應如是發大誓願於我如是甚深經典當共護持亦斷衆生五陰見故而爲說法持世我是經中說破一切陰相離貪著陰相爾時多有在家出家聞如是等經起於諍訟不生實想菩薩摩訶薩於此中應發大誓願我等於後惡世貪著五

陰邪見衆生作大利益所謂度脫貪著見五陰衆生隨宜方便以法利益是故持世菩薩摩訶薩若欲得善知諸法實相亦善分別諸法之相欲得念力欲分別一切法章句慧欲得轉身成就不斷念乃至得阿耨多羅三藐三菩提應常觀是五取陰無常相苦相無我相虛妄不堅牢相畢竟空相從本已來不生相常正觀時五取陰中所有欲染則能除斷亦得如是等深法中方便持世過去無量阿僧祇劫爾時有佛名大意山王如來應正遍知明行足善逝世間解無上士調御丈夫天人師佛世尊持世是大意山王佛

有八十億那由他聲聞衆皆是阿羅漢諸漏已盡及八十億那由他學地阿那含諸菩薩摩訶薩四十億那由他其大意山王佛壽八萬歲持世爾時有王名爲得益是得益王有二萬大城具足豐樂人民充滿其城七重縱廣十二由旬四寶合成有七重塹皆有欄楯七重行樹諸寶羅網徧覆其上城塹諸樹及上羅網皆以黃金瑠璃砮磔碼碯四寶合成一一大城各有五百園林皆有七寶衣樹充滿其中一一園林各有五百寶池八功德水皆滿其中持世是得益王有八萬姝女其大夫人有二子一名無量意二名無

量力持世是二王子各年十六夢中見佛端正無比如閻浮檀金幢見大歡喜覺已各說偈曰其一人言

我今夢見二足尊 金色百福相莊嚴

成就無量諸功德 見已心得大歡喜

### 第二人言

我夢見佛明如日 端正殊妙第一尊

猶如須彌衆山王 巍巍高顯見歡喜

持世卽時無量意無量力二子請父母所具說是事白父母言今我二人於夢中見佛惟願父母當聽我等俱請佛所佛久出世我等放逸故不能覺知沒五

欲泥爲色縛所縛爲受想行識縛所縛我等在家以放逸故不能見佛持世是二子爲父母說是事已卽詣大意山王佛所到已頭面禮佛足請佛及僧三月四事供養衣服飲食卧具醫藥於大城邊莊嚴得益王所遊園林懸繒旛蓋寶華覆地奉佛及僧令止其中其二王子三月之中以一切樂具供佛及僧供養已畢於佛法中俱共出家持世其大意山王佛知此二王子深心所願而爲廣說是五陰十二入十八性菩薩方便經於四萬歲中終不睡眠常不滿食亦不傾卧若坐若經行又於四萬歲中不念餘事但念五

受陰虛妄空相知是五陰從顛倒起通達是五取陰相畢其年壽常修梵行命終卽生兜率天上於佛滅後還生閻浮提大居士家至年十六復夢見佛爲說是五陰十八性菩薩方便經聞是法已卽覺驚懼復於佛法滿萬歲中常修梵行亦復方便深觀是五陰十二入十八性菩薩所行方便經命終生於忉利天上畢天之壽生閻浮提大姓婆羅門家大意山王佛法末後千歲之中其二人以本因緣故復得出家學問廣博其智如海亦善觀擇是五陰性入法如實通了於其世中教化二萬人二十億天於阿耨多羅三

藐三菩提持世是二菩薩從是已後世世同心共值  
十億那由他佛然後乃得無生法忍得法忍已復值  
一億那由他佛然後得阿耨多羅三藐三菩提二人  
同劫次第作佛一名無量音二名無量光持世是故  
諸菩薩摩訶薩若欲疾得阿耨多羅三藐三菩提當  
於是清淨無染法中勤行修習此陰入性及餘有爲  
法中說實知見相

十八性品第三

持世何謂菩薩摩訶薩善知十八性諸菩薩摩訶薩  
方便正觀十八性作是念眼性眼性中不可得是眼  
性無我無我所無常無堅牢自性空故眼性中眼性  
相不可得故眼性虛妄無所有從憶想分別起眼性  
無有決定相虛空性是眼性譬如虛空無決定相無  
根本故眼性亦如是無決定相亦無根本故何以故  
眼性中實事不可得故眼性無處無方不在內不在  
外不在中間眼性無決定相以無事故眼性事不可  
得衆因緣生故眼性不過去不未來不現在眼性眼  
相不可得眼性但以先業果報故屬現在緣故數名  
眼性眼性者卽是無性眼性中眼性不可得識行處  
故數名眼性若眼根清淨色在可見處意根相應以

三事因緣合故說名爲眼性眼性中無決定眼性相  
智者通達無眼性是眼性持世諸菩薩摩訶薩若能  
如是觀擇眼性卽通達無性是色性何以故色性中  
色性不可得是色性不合不散色無決定相故說名  
色性色無根本無分別何況色性色性則是示無根  
本色性不在色內不在色外不在中間但以憶想分  
別色在可見處眼根清淨以意識相應見現在色故  
數名色性譬如鏡中面像若鏡明淨則生色相鏡中  
色無決定相鏡中無人而見色像但以外有鏡內起  
色相如是眼性清淨所緣色性在可見處如鏡中像

數名色性色無性相無形性無決定性是名色性諸  
色相無我故數名色性隨衆生所知故說名色性若  
菩薩知是色性卽知無性是色性無生性是色性無  
作性是色性何以故是色性不過去不未來不現在  
亦無所有性亦虛妄性亦假名性名爲色性如是觀  
擇色性是菩薩正觀擇眼識性所謂眼識中無眼識  
無眼識性無有常性眼識性無有根本無決定法眼  
識性無所示是眼識性非合非散無有根本但以先  
業因緣起屬現在緣繫色緣故數名眼識性隨凡夫  
顛倒心故數名眼識性賢聖通達眼識性卽是非性

何以故眼識性無決定故從衆緣生屬諸緣故數名  
眼識性識所行處是眼識性是識無決定故說無決  
定相無生故示虛妄故能分別色相故能示緣故說  
是眼識性隨衆生所知如來方便分別破壞和合一  
相故說十八性示識無決定相但眼清淨能知色相  
二法和合故說眼識性示眼識實相故說眼識性眼  
識性者示眼所行處能識色是眼識性卽是說無性  
何以故智者眼識性中求眼識性相不可得眼識性  
中亦不得眼識性根本所以者何無決定性是眼識  
性眼識性者以假名說所說性者卽是說不取義能

有所見處是眼識意業起是眼識相故名爲眼識以  
眼性色性眼識性說三事和合以知諸緣相故卽是  
離諸性義所謂是眼性是色性是眼識性有如是數  
得令衆生入於實道此中實無眼性色性眼識性諸  
如來說是知見諸性相方便分別說是諸性若人通  
達是諸性方便者則知三性無性何以故諸性中無  
性相故諸性中相不可得故耳性聲性耳識性鼻性  
香性鼻識性舌性味性舌識性身性觸性身識性皆  
亦如是持世何謂菩薩摩訶薩觀擇意性菩薩作是  
念意性無決定根本無所有故意性中無意性無決

定性是意性譬如諸種子種於大地因於水潤得日得風漸漸芽出芽不從種子出種子亦不與芽和合芽生則種子壞種子不離芽芽不離種子芽中無種子意性亦如是能起意業故示意識故如種示芽得名意性離意性則無意意性不能知意假名字故說爲意性是意性不在意內不在意外不在兩中間但以先業因緣故起識是意業故知所緣故諸性名字合故現在緣起故數名意性卽是不決定意業相卽是衆緣和合相亦說意性從和合起隨衆生所知於第一義中無有意性何以故根本無所有故無生是

意性生無所有故意性卽是世俗語第一義中決定無意性過去未來現在不可得智者通達無性是意性諸菩薩觀擇法性無性是法性法性無自性自性不可得無決定性是法性法性根本不可得故決定事亦不可得故但爲起顛倒衆生虛妄結縛有所知故說言法性欲令衆生入無性故說是法性何以故法性中無法性相是法性從衆緣生從衆緣生法卽無自性諸因緣中無有自性諸因緣皆從衆緣和合故相續而生如來於此欲教化衆生說是法性以世俗語言示無性法是法性不在內不在外不在兩中

間但令衆生知見善不善法以法性說離一切法相  
知見畢竟空相故說畢竟空卽是法性何以故無所  
有是法性法性中無決定有相譬如虛空無決定相  
而數名虛空法性亦如是無決定相破法相故說名  
法性法性卽是無性何以故是法性不在過去不在  
未來不在現在但屬衆緣與緣合故數名法性說名  
法性如衆生所知故智者證知無性是法性法性非  
合非散法性中無法性相無多無少以示性方便故  
說法性名爲性若行者實通達是法性相卽知見無  
性是三界法性中無分別相衆因緣合故分別諸法

故說是法性分別諸法示無決定性是法性智者非  
以法性相故見法性法性是無生相何以故法性中  
無有相智者通達無相是法相法性中無分別相無  
相無分別故說名法性法性中無有任處無處無起  
無住無依止是法性從本已來不生故是法性無有  
生者何以故法性中無性故又法性不以合故有無  
合無散無作無決定名爲法性諸菩薩摩訶薩觀擇  
法性如是所謂無性是法性持世何謂菩薩摩訶薩  
觀擇意識性菩薩摩訶薩作是念不生性是意識性  
不決定性是意識性意識性無根本無有定法以意

識性示無性相何以故意識性中意識性不可得是  
意識性虛妄無所有顛倒相應以意爲首識諸法故  
名爲意識隨凡夫所行故說意識性賢聖觀知非性  
是意識性虛妄無所有是意識性但示因緣法故以  
意爲首故識諸緣合故說爲意識性隨衆生所知故  
如是說智者知非性是意識性從衆因緣生憶想分  
別起無有性相卽是第一義中無性相義世俗法中  
爲引導衆生故說是意識性欲令衆生知無性是意  
識性但以小法壞離諸性故說意識性何以故聖人  
求之不可得意識性不在意識性內不在意識性外

不在兩中間智者通達不合性是意識性意識性不  
能知意性意性不能知意識性但衆因緣生從顛倒  
起以意爲首知於諸緣二事和合故著虛妄故從覺  
觀起示衆生識相故說各意識性是意識不在過去  
不在未來不在現在是意識無所從來去無所至無  
有住處從本已來不生相意識中無根本定法何以  
故是意識性相卽是無二相卽是無相是相不以二  
相故有無所示性是意識性智者通達意識性如是  
是意識性不在一切法中無處無方不與法若合若  
散聖人通達不生相是意識性是意識性無來無去

無緣何以故第一義中意識性無緣不可得不可示  
故智者通達意識性不作是意識性作者不可得故  
無生是意識性生相無所有故持世菩薩摩訶薩如  
是觀擇意識性諸菩薩作是觀時觀擇欲界色界無  
色界皆是無生性無所有性云何爲觀所謂欲界中  
無欲界色界中無色界無色界中無無色界以界示  
無界法爲取欲界相者示是欲界爲取色界相者示  
是色界爲取無色界相者示是無色界以界寄說無  
界如智者所知無所有界是欲界色界無色界智者  
不得欲界色界無色界是三界皆無根本無有定法

從衆因緣起是故智者知見無界是三界此中無有  
界相是三界皆虛妄合顛倒行何以故智者不得是  
三界不說是三界若過去若未來若現在賢聖通達  
是三界虛妄無所有無自性離諸法但從顛倒起爲  
斷衆生顛倒故知見三界故如來分別說是三界相  
欲令衆生知無界義故說三界非以性相有智者知  
見三界相是無界相持世菩薩摩訶薩如是觀時觀  
衆生性我性卽是虛空性無所有性無生性何以故  
衆生性我性虛空性無別無異如是諸性皆從虛空  
出但從衆緣生故名之爲性此中決定無性相何以

故虛空中無一定性是諸性相皆入虛空是無所有  
義譬如虛空無性是法畢竟離相無所有相一切諸  
法亦如是離性相諸性中無性相性相不在內不在  
外不在兩中間性中無有性性中不攝性性不依止  
性一切性無所依止一切性不生智者於諸法性中  
不得生性不得滅性不得住性一切諸性不生不起  
不住從本已來不可得智者不貪不著諸性假名不  
受不念是故智者通達知見一切諸性皆是無生相  
若是無生相即無有滅第一義中一切諸性不可得  
世俗法故分別說諸性第一義中不說諸性智者知

見通達一切諸性如第一義持世諸菩薩摩訶薩如  
是觀擇通達十八性及三界衆生性我性虛空性諸  
菩薩如是觀擇通達時不得性不見性亦通達一切  
諸性假名字亦信解入一切諸性是無性亦知分別  
諸性以世俗分別說諸性令一切諸性入第一義中  
亦善通達無性方便亦爲衆生分別說諸性亦令衆  
生善住諸生方便以世俗語言爲衆生說無性法亦  
不以二相示諸性雖知一切諸性無二亦以方便說  
諸性從因緣起雖以世俗言說引導衆生而示衆生  
第一義雖善知分別諸性而信解通達一切諸性無

所有何以故持世如來以第一義故於性無所得亦不得諸法性相持世我於諸法無所斷無所壞得阿耨多羅三藐三菩提何以故第一義中無諸性一切相性無所有無決定一切性同虛空一切性入虛空一切性無生相如來通達一切性如是持世如來不說諸性相亦不說諸法力勢何以故若法無所有不應更說無所有性相持世如來亦說無所有性相此中實無所說性相持世是名善分別諸性菩薩摩訶薩得是善分別能知一切諸性假名能知世俗相能知第一義相能知諸性決定能知世諦能分別諸相

能知隨宜能知諸相合能知諸相旨趣能知諸相所入能分別諸相能知諸法相無性能令一切諸性同虛空性亦於諸性不作差別於諸性中不得差別不說差別亦爲衆生善說破壞諸性持世譬如工幻師能示衆生種種幻事令知種種幻相若有知識親友語言是幻說幻實事是幻虛妄示顛倒衆生若有智者則知是幻持世世間性如幻諸菩薩摩訶薩入此幻法中知世間是幻性世間所行如幻是人以方便力示衆生世間如幻若有知此世間如實相爲說世間虛妄如幻若有深智利根而開示之自能得知如

諸法空如幻無實無有根本知一切法皆誑凡夫一切法皆繫虛妄緣中持世是故諸菩薩摩訶薩若欲入如是諸性方便於如是等深經無染無得說一切諸法性知見相說一切諸性無文字無和合亦說諸性方便智慧亦說因緣所作旨趣亦說一切諸法如實相所謂世間出世間有爲無爲繫不繫善知方便旨趣說第一義世俗義了義經未了義經種種因緣解說於是甚深經中應勤精進

持世經卷第二

音釋

羸

力追切

歌羅邏

梵語也此云凝滑邏郎佐切

胭

烏前切

紹興府山陰縣信官張汝懋男頰董氏法名大道孫男張震張陞張維佳玄孫張錦施貴刻持世經第二卷  
崇禎丁丑歲二月徑山寂照菴識

持世經卷第三

姚秦三藏法師鳩摩羅什譯

十二入品第四

佛告持世何謂菩薩摩訶薩善知十二入菩薩摩訶  
薩正觀擇十二入時作是念眼中眼入不可得眼中  
眼入無決定又眼入根本不可得何以故眼入從衆  
緣生顛倒起以緣色故繫在於色二法合故有因色  
有眼入因色說眼入二法相依故說名眼色所謂眼  
色色是眼入門與緣故眼是色入門與見故是故說  
入以緣色入門故說眼入以眼見故說色入但以世

論故說其實眼不依色色不依眼眼不依眼色不依色但從衆緣起色作緣故說名眼入又從衆因緣起眼所知見故說名色入云何爲說隨世俗顛倒法故說第一義中眼入不可得色入不可得智者求諸入不見有實但以凡夫顛倒相應以二相說是眼入是色入是眼入是色入卽是示虛妄入欲令衆生如實知諸法實相故說是諸入皆從衆因緣生顛倒相應行此中諸入相實不可得何以故若眼入若色入不在內不在外不在兩中間眼入色入亦非過去非未來非現在但現在因緣知色故說眼入如凡夫所行

智者通達諸入皆是虛妄無所有從憶想顛倒分別起知見非入是入不說諸入性諸入無決定相但以衆因緣生故說如來說是諸入知見相所謂是諸入虛妄無所有屬諸因緣顛倒相應行諸入無有作者無使作者眼入不知不分別色入色入亦不知不分別眼入二俱離相若法離相此中不可分別說是入相皆從因緣生如凡夫顛倒如賢聖所通達是眼入色入無生無滅不來不去相眼不知眼眼不分別眼色不知色色不分別色何以故二俱空故二皆離故眼不知眼性色亦不知色性眼色皆無性無法此中

無一決定相眼不自作眼亦不自知色不自作色亦不自知二俱無所有故眼不作是念我是眼色亦不作是念我是色眼色性如幻性以虛妄假名故說是眼是色諸菩薩觀擇眼入色入如是耳聲鼻香舌味身觸亦如是持世何謂菩薩摩訶薩觀擇意入諸菩薩摩訶薩觀擇意入時作是念意入中意入不可得意無決定入相意入無根本何以故意入卽是衆因緣生從顛倒起繫法入緣二法和合能有所作是意入因法入起因法入可分別說是二相依意是法入處意是法入門法入是意入門是故說名法入緣法

入門故說是意入示知意相門故說是法入以世諦故說其實意不依法法不依意因緣生故以諸法爲緣故說意入因緣生故示意相故說法入隨世諦顛倒故說第一義中意入不可得法入亦不可得智者求諸入不見有實但凡夫顛倒相應以二相說是意入見法入是意入法入虛妄無所有如來如實通達故示是諸入如是諸入從因緣生顛倒相應行此中意入法入實不可得又意入法入不在內不在外不在兩中間又意入非過去非未來非現在但能覺現在緣故說意入法入隨凡夫心故說智者通達是意

入法入虛妄無所有從憶想顛倒分別起非入是入  
何以故諸入中無決定入相智者通達是諸入虛妄  
無所有意入法入自性不可得亦不得是意入法入  
所起實相是意入法入但因緣生如來說是諸入知  
見相是諸入虛妄無所有顛倒相應行屬諸因緣意  
入法入無有作者無使作者意入不知不分別法入  
法入亦不知不分別意入何以故二俱離故若法離  
相此中無可分別是諸入皆從因緣生隨凡夫顛倒  
心故說如賢聖所通達意入法入不生不滅不來不  
去意不知意不分別意法不知法不分別法二俱空

故二俱離故意不知意性法不知法性是二性無所  
有此中無一決定法意不能成就意不能壞意法不  
能成就法不能壞法二俱無所有故意入不作是念  
我是意入法入不作是念我是法入是二俱空皆如  
幻相但假名字故分別說菩薩摩訶薩觀擇意入法  
入如是持世何謂諸菩薩摩訶薩正觀擇內六入外  
六入所謂是十二入皆虛妄從衆緣生顛倒相應以  
二相故有內外用凡夫不聞真法不知十二入如實  
相故貪著眼入我是眼入我所是眼入貪著色入我  
是色入我所是色入耳聲鼻香舌味身觸意法亦如

是我是意入我所是意入我是法入我所是法入以  
貪著故爲十二入所縛馳悉往來五道生死不知出  
道菩薩摩訶薩於此中正觀十二入時見是十二入  
虛誑不堅牢空如幻相不貪著眼入若我若我所乃  
至不貪著法入若我若我所以不貪著故不憶念分  
別菩薩如是善知十二入持世菩薩摩訶薩得如是  
諸入方便於一切十二入中不繫不縛亦證諸入知  
見而能分別諸入亦以衆緣生法通達十二入亦以  
無相相壞十二入亦不隨是諸入所依道中亦知諸  
入性則是無性亦知諸入方便究竟到邊持世譬如

機關出水四面俱灑十二入亦如是內外因緣能有  
所作此中實事不可得是十二入先業機關所繫故  
能有所作持世所謂入者是諸凡夫無知見者煩惱  
所入門眼是色門以生愛恚故色是眼門以生愛恚  
故耳鼻舌身意是法門以生愛恚故法是意門以  
生愛恚故如是十二入與愛恚合故不知實相持世  
菩薩摩訶薩於此中善知諸入性知是諸入實相故  
不爲愛恚所制持世菩薩摩訶薩善知諸入如是  
十二因緣品第五  
持世何謂諸菩薩摩訶薩善觀擇十二因緣菩薩摩

訶薩觀擇十二因緣所謂無有故說名無明於無明  
中無法故說名無明不知明故說名無明云何不知  
明不知無明中決定法不可得是名無明何故說無  
明因緣諸行諸行無所有而凡夫起作是故說無明  
因緣諸行從行起故有識生是故說諸行因緣識從  
識生名色二相是故說識因緣名色從名色生六入  
是故說名色因緣六入從六入生觸是故說六入因  
緣觸從觸生受是故說觸因緣受從受生愛是故說  
受因緣愛從愛生取是故說愛因緣取從取生有是  
故說取因緣有從有生生是故說有因緣生從生有

老歎憂悲苦惱聚集是故說生因緣老歎憂悲苦惱  
聚集如是但是大苦惱聚於此中爲集何法但知顛  
倒與明相違無明聚爲後身愛依止喜染求處處生  
則是愛集持世世間如是爲十二因緣所繫縛盲無  
眼故入無明網墮黑闇中無明爲首故具足起十二  
因緣諸菩薩如是思惟觀無明實相知無明空故本  
際不可得何以故無明無故本際無智者觀非際是  
本際則不分別本際斷憶想分別故不貪著無明知  
一切法無所有是法不爾如所說若說一切法無所  
有卽是說知見無明能通達一切法無所有是爲卽

得明於此中更無餘明但知見無明是名爲明云何  
爲知見無明所謂一切法無所有一切法無所得一  
切法虛妄顛倒一切法不爾如所說是名知見無明  
知見無明卽爲是明何以故明無所有故無明因緣  
諸行者諸法無所有凡夫入無明闇冥中誑惑作諸  
行業是行業無形無處是無明不能生行業無法而  
起作故說無明因緣行業行業無有聚集若是處若  
彼處來諸行業亦非過去亦非未來亦非現在無明  
無明性空行業行業性空諸行業無所依但依無明  
起諸行業行業不依無明無明不依行業無明不知

無明行業不知行業如是無明行業以顛倒故從無  
明生此中不得無明不得諸行不得無明性不得諸  
行業性不得行業性但以闇冥數名闇冥以是無明  
闇冥故分別說行業從無所有法起作故無明行業  
皆是無所有諸行業因緣識者是識不依行業亦不  
離行業生識行業亦不生識何以故行業不知行業  
行業亦無持來者但顛倒衆生從行業生識是識不  
在行業內不在行業外亦不在中間是識無有生者  
亦無使生者但緣行業相續不斷故有識生智者求  
識相不可得亦不得識生識亦不知識識亦不見識

識不依識識因緣名色者名色不依識亦不離識生  
名色是名色亦不從識中來但緣識故凡夫闇冥貪  
著名色識亦不至名色智者於此求名色不可得不  
可見是名色無形無方從憶想分別起是名色相識  
因緣故有識性尚不可得何況從識緣生名色若決  
定得名色性者無有是處名色因緣六入者是六入  
因名色起名色在身中故有入出息利益身及心心  
數法是六入皆虛誑無所有從分別起有顛倒用六  
入因緣觸者是觸依色而有觸不觸色何以故色無  
所知與草木瓦石無異但從六入起故分別說是觸

何以故六入尚虛妄無所有何況從六入生觸觸空  
無所有從憶想顛倒起是觸無方無處觸空以無觸  
性故觸不知六入六入亦不知觸觸因緣受者是諸  
受不在觸內不在觸外不在兩中間是觸亦不餘處  
持受來而從觸起受是觸尚虛妄無所有何況從觸  
生受受無一決定相受皆無所有從顛倒起有顛倒  
用受因緣愛者是受不於餘處持受來受亦不與愛  
合受亦不知愛不分別愛愛亦不知受不分別受愛  
不與受合是愛亦不依受亦不離受有愛受中尚無  
受相何況受因緣生愛愛不在受內不在受外不在

兩中間愛亦不在愛內亦不在愛外亦不在兩中間  
愛中愛相不可得是愛但從虛妄憶想顛倒相應故  
名爲愛是愛非過去未來現在是愛非以縛相故起  
是愛亦非縛相故住以因緣相續不斷故說受因緣  
愛智者知是愛無處無方空無堅牢虛妄無所有愛  
因緣取者愛不於餘處持取來愛不與取合愛亦不  
能生取有愛故說名取隨因緣和合故說取不與愛  
合亦不散愛不與取合亦不散取不在愛內不在愛  
外亦不在兩中間愛尚無有何況愛因緣生取諸取  
決定相不可得智者知見是取虛妄無所有取中無

取相是取非過去未來現在取不在取內不在取外  
不在兩中間但從顛倒起因本緣生今衆緣故有取  
無有法若合若散是取無有根本無一定法可得凡  
夫受是虛妄取是諸行皆虛妄故世間爲取所繫縛  
智者通達是取虛妄空無堅牢無有根本無一定法  
可得取因緣有者是取不持有來取不能生有而說  
取因緣有是有不在取內不在取外不在兩中間有  
不依止取取不與有合亦不散但以衆緣和合故說  
取因緣有取不能生有取不分別有取尚虛妄無所  
有何況從取因緣生有有無有持來者有中不可

得有不在有內不在有外不在兩中間是有非過去  
未來現在智者通達是有虛妄顛倒相應無合無散  
有無所知無所分別是有無處無方是有無前際無  
後際無中際是有非有故非無故但隨順十二因緣  
故說是有智者通達有相空無堅牢有因緣生者是  
有不持生來生亦不與有合亦不散是生不在有內  
不在有外不在兩中間有不能生生亦不離有生生  
但示十二因緣相續說有因緣生有與生非緣非不  
緣有尚不可得何況從有生生智者通達是生不依  
於有生中無生相生中無自性生中無根本無一定

法可得智者通達是生無性無所有但示十二因緣  
和合相續故說有因緣生生無有法若合若散生不  
在有內不在有外亦不在兩中間是生非過去非未  
來非現在是生前際後際中際不可得是生根本不  
可得智者通達從衆因緣生顛倒相應虛妄無所有  
如幻化相生因緣老歿憂悲苦惱者是生不持老歿  
憂悲苦惱來生亦不能生老歿憂悲苦惱老歿憂悲  
苦惱不在生內不在生外不在兩中間老歿憂悲苦  
惱亦不依止生以生故老歿憂悲苦惱可說但示衆  
因緣生法故生不與老歿憂悲苦惱合亦不散生中

生尚不可得何況生因緣老歿苦惱老歿苦惱中老  
歿苦惱不可得何以故老歿苦惱不在老歿苦惱內  
亦不在外亦不在兩中間老歿苦惱非過去未來現  
在老歿苦惱不與老歿合亦不散但顛倒相應眾緣  
和合具足十二因緣故說生因緣老歿苦惱老歿苦  
惱無所依止老歿苦惱決定相不可得老歿苦惱前  
際後際中際不可得智者通達老歿苦惱虛妄無所  
有顛倒相應無有根本不作不起不生如是觀十二  
因緣法不見因緣法若過去若未來若現在亦不見  
十二因緣法相但知因緣是無緣無生無相無作無

起無根本從本以來一切法無所有故通達是十二  
因緣亦不見是十二因緣有作者受者若法所從因  
生是因無故是法亦無菩薩隨無明義故一切法不  
可得入如是觀中無緣卽是十二因緣此中無所生  
菩薩觀十二因緣是虛妄生隨順無明義通達十二  
因緣若法無者是法亦無是故說隨順無明義通達  
十二因緣無明是不生不作不起無根本無一定法  
無緣無所有菩薩爾時不分別是明是無明無明實  
相卽是明因無明故一切法無所有一切法無緣無  
憶想分別是故隨順無明義通達十二因緣持世是

名諸菩薩摩訶薩十二因緣方便智慧若菩薩能如是通達十二因緣合散是名菩薩善得無生智慧何以故以生滅觀則不能善知十二因緣若觀衆緣集散是名得無生智慧若得無生智慧是名通達十二因緣持世是故諸菩薩摩訶薩欲入通達欲證無生智慧應當知如是勤行修習是十二因緣智慧則能觀證十二因緣無生相持世若菩薩摩訶薩知無生卽是十二因緣者則能得如是十二因緣方便是人以無生相知見三界疾得無生法忍當知是菩薩於諸現在佛得近受阿耨多羅三藐三菩提記是菩薩

不久當得受記次第受記持世如是善人因與受記得安隱心於一切法盲翳方便中得智慧光明是人通達十二因緣是無生是人得近現在諸佛是人於諸惡魔無所怖畏是人度生歿流得到陸地是人得度無明淤泥是人得到安隱之處持世若於今世若我滅後若聞若信若讀誦若修習是十二因緣方便者我與是人受記不久當得無生法忍我亦記是人不久當於現世諸佛所得受阿耨多羅三藐三菩提

記

四念處品第六

經

詩經卷三

三

第廿

佛告持世何謂菩薩摩訶薩善知四念處菩薩摩訶  
薩觀擇四念處循身觀身循受觀受循心觀心循法  
觀法何謂爲循身觀身循受心法觀受心法持世菩  
薩摩訶薩循身觀身時如實觀身相所謂是身無常  
苦如病如瘡苦惱憂衰動壞之相是身不淨惡露可  
惡種種充滿其內九瘡孔中常流不淨是身臭穢猶  
如行廁如是正觀身時不得是身一毫清淨無不可  
惡者知是身骨幹筋纏皮肉所裹從本業因緣果報  
所起集取所縛何等爲集何等爲取從先因緣起是  
身是名爲取今以沐浴飲食衣服牀臥被褥醫藥是

名爲集如是現在因緣爲集取所縛本業果報力故  
有用又是身四大所造無決定實色陰所攝數名爲  
身何故說名爲身能有所作故說名爲身貪著依止  
處故說名爲身隨意有用故說名爲身從憶想分別  
起故說名爲身假合作故說名爲身與業合故說名  
爲身是身不久終歸壞敗無常無定變異之相是身  
不在身內不在身外不在兩中間是身不知身不見  
身是身無作無動無有願求亦無有心與草木瓦石  
等無有異身中無有決定身相如是正觀擇身知是  
無有作者亦無使作者是身無前際無後際無中際

是身無一常定堅牢相如水沫聚不可撮摩是身八  
萬蟲之所住處是身百種諸病之所侵惱以三苦故  
是身爲苦無有救者所謂行苦壞苦苦苦是身衆苦  
之器如是正觀身時又復思惟是身非我非彼不得  
自在不得隨意作是不作是身無根本無一定法  
可得是身性空無決定相是身虛妄所起繫於機關  
作法從本業因緣起不應於身中生我我所想我等  
不應惜身壽命菩薩如是觀時不得身若合若散不  
見有所從來去有所至有所住處不分別是身若過  
去若未來若現在則不依止身命不貪惜身若我若

我所常離身受是菩薩觀身空無我無我所是身中  
我我所不可得故是身相不可得是菩薩若不得身  
相卽不願身入身無起作道云何爲入是身無有作  
者無有起者是身不作不起相從衆因緣生是因緣  
能和合身而是因緣亦虛誑無所有顛倒相應空無  
堅牢亦以是因緣故是身得生是因緣亦無生無相  
如是觀身卽入身無生相中入已觀身無相以無相  
正觀身知是身無相相不可得故無生是身過去相  
未來相現在相不可得何以故是身無根本無一定  
法可得是身若彼若此不可得如是觀時知身無所

1  
2  
3  
4  
5  
6  
7  
8  
9  
200  
1  
2  
3  
4  
5  
6  
7  
8  
9  
210  
1  
2  
3  
4  
5  
6  
7  
8  
9  
220

從來去無所至卽入身不生不滅道持世菩薩摩訶  
薩如是循身觀身入如實相於身欲染則能除斷疾  
令其念正住身中是名循身觀身持世何謂菩薩摩  
訶薩循受觀受菩薩摩訶薩觀苦受樂受不苦不樂  
受見是三受無所從來去無所至但虛妄緣合本業  
果報所持顛倒相應知諸受虛妄從憶想分別起菩  
薩如是觀諸受不得過去受不得未來受不得現在  
受是菩薩見過去諸受受空無我無我所無常無堅牢  
無不變異相觀是過去諸受受空相寂滅相無相相觀  
未來諸受受空無我無我所無常無堅牢無不變異相

觀未來諸受受空相寂滅相無相相是菩薩如是觀時  
作是念諸受無決定相無有根本無一定法不相似  
故知新生滅諸受無有住時菩薩作是念是諸受無  
作亦無作者但凡夫顛倒相應心中起三種受屬本  
業因今世緣合故有是諸受是諸受皆空無有堅牢  
虛妄之法猶如空拳如是觀時因此諸受心住一處  
菩薩爾時得達諸受集沒滅相見諸受不散不散又  
受中不見受作是念諸受空性空故卽通達諸受無  
生相此諸受無生無滅無有成相是諸受皆無相無  
成相如是思惟受諸受時皆能不著如實知見諸受

1  
2  
3  
4  
5  
6  
7  
8  
9  
200  
1  
2  
3  
4  
5  
6  
7  
8  
9  
210  
1  
2  
3  
4  
5  
6  
7  
8  
9  
220

經

持世卷三

一

常九

相離諸所受於此諸受亦無所依於諸受中心皆放捨則疾得捨三昧持世諸菩薩摩訶薩循諸受觀諸受如是持世何謂菩薩摩訶薩循心觀心菩薩摩訶薩觀心生滅住異相如是觀時作是念是心無所從來去無所至但識緣相故生無有根本無一定法可得是心無來無去無住異可得是心非過去未來現在是心識緣故從憶念起是心不在內不在外不在兩中間是心無一生相是心無性無定無有生者無使生者起雜業故說名爲心能識雜緣故說名爲心念念生滅相續不斷故說名爲心但令衆生通達心

緣相故心中無心相是心從本已來不生不起性常清淨客塵煩惱染故有分別心不知心亦不見心何以故是心空性自空故根本無所有是心無有一定法定法不可得故是心無法若合若散是心前際不可得後際不可得中際不可得是心無形無能見者心不自見不知自性但凡夫顛倒相應以虛妄緣識相故起是心空無我無我所無常無堅牢無不變異相如是思惟得循心念處是人爾時不分別是心是非心但善知心無生相通達是心無生性何以故心無決定性亦無決定相智者通達是心無生無相爾

經

持世卷三

一

常九

時如實觀心生集滅相如是觀時不得心若集相若滅相不復分別心滅不滅而能得心真清淨相諸菩薩以是清淨心客塵所不能惱何以故諸菩薩見知心清淨相亦知衆生心清淨相作是念心垢故衆生垢心淨故衆生淨如是思惟時不得心垢相不得心淨相但知是心常清淨相持世諸菩薩摩訶薩循心觀心如是持世何謂菩薩摩訶薩循法觀法諸菩薩觀一切法不見內不見外不見兩中間亦不得諸法若過去若未來若現在但知諸法從衆緣生顛倒起諸法無有決定相所謂是諸法屬是人是法本體於

諸法中無諸法諸法不在諸法內不在諸法外不在兩中間諸法不與諸法合亦不散一切法無根本無一定相諸法無所有故不動不作一切法如虛空無所有故一切法虛誑如幻幻相無所有故一切法常淨相俱不汙故一切法是不受相諸受無所有故一切法如夢夢性無所有故一切法無形形無所有故一切法如像性常無故一切法無名無相名相無所有故一切法如響虛妄所作無所有故一切法無性性不可得故一切法如燄知無所有故菩薩如是觀一切法時不見諸法若一相若異相亦不見法與法

若合若散亦不見法依止於法如是觀時見一切法無所從來亦不見一切法住處何以故一切法無住無依無起一切法無住處住處無所有故住處不可得故持世諸法無有差別一切法無分別相從衆緣生顛倒故有用是諸法無處無方智者得諸法非一相非二相非異相何以故持世一切法不生不作不起無能作者一切法離根本一切法無自性過諸法性故一切法無歸處諸歸處無所有故如是觀諸法善知諸法無我無人觀擇諸法性空是諸法皆空性自空故諸法無相不見相故於諸法中不起願即時

觀擇一切法無生作是念此中實無有法若生若滅如是觀時心一處住爾時便得通達一切法無生亦知見一切法集盡滅亦能入一切法離相離性何以故持世一切法無決定性智者通達諸法無相離相持世菩薩摩訶薩循法觀法如是觀者於法無所得無所受於法不爲生不爲住不爲滅故行而見一切法盡滅相寂滅相持世是名菩薩摩訶薩善觀四念處何故說名念處念處者卽是一切法無處無起處無所有處能如是入一切法則念不亂名爲念處又念處是一切法不住不生不取如實知見處名爲念

處

五根品第七

持世何謂諸菩薩摩訶薩善知諸根菩薩摩訶薩正觀出世間五根何等五所謂信根精進根念根定根慧根菩薩修習五根時信一切法皆從衆因緣生顛倒所起虛妄緣合似如火輪又如夢性信一切法無常苦不淨無我如病如瘡無有堅牢虛偽不實壞敗之相又信一切法虛妄無所有猶如空拳如虹雜色誑於小兒憶想分別假借而有無有本體無一定法又信一切法非過去非未來非現在信一切法無所

從來去無所至信一切法空無相無作信一切法無生無作無起無相離諸相而信持戒清淨禪定清淨智慧清淨解脫清淨解脫知見清淨菩薩如是成就信根得不退轉以信爲首故能住持戒是信常不退不失成就不退法安住不動信中常隨業果報成就信人斷一切邪見不離法求師但以諸佛爲師常隨諸法實相知僧行正道住清淨戒成就忍辱得如是不動不壞信增上信故名爲成就信根持世何謂菩薩摩訶薩正觀精進根成就精進根善知精進根諸菩薩摩訶薩行精進不休不息常欲除五蓋故勤行

精進乃至爲聽如是等深法名爲精進是菩薩求法不休不息精進不退亦欲斷諸障礙法故勤行精進而而不怯弱亦爲斷種種惡不善衰惱法故勤行精進又爲增長種種善法故勤行精進是菩薩決定成就精進不貪著是精進而入平等精進成就不退精進是人爲正方便通達一切法故發行精進於精進中不隨他人於精進中得智慧明成不退相能得如是不退精進增上精進故得名成就精進根持世何謂菩薩摩訶薩能得念根善修習念根諸菩薩摩訶薩常攝一處布施柔和具足梵行持昇竟清淨戒衆定

衆慧衆解脫衆解脫知見衆常思念淨身口意業常思念究竟其事常思念一切法生滅住異相方便常思念知見苦集滅道諦常思惟諸根力覺道禪定解脫諸三昧方便常思念一切法不生不滅不作不起不可說相常思念欲得無生智慧常思念欲得具足忍智離智滅智常思念欲得具足佛法常思念不使聲聞辟支佛法入心常思念無礙智慧常不忘不失不退是念入如是觀中而不隨他人得如是堅牢增上念故名爲成就念根持世何謂菩薩摩訶薩能得定根能得定根方便諸菩薩摩訶薩於定地中常

行禪定不依禪定不貪禪定善取禪定相善得禪定  
方便善能生禪定亦能行無緣禪定悉知諸禪定門  
善知入禪定善知住禪定善知起禪定而於禪定無  
所依止善知所緣相善知緣真相亦不貪受諸禪味  
於諸定中自在遊戲而不隨他亦不隨禪生於諸定  
中得自在力於諸定中不以爲難不以爲少隨意所  
欲是人得如是增上禪定故名得定根名得定根方  
便持世何謂菩薩摩訶薩成就慧根得慧根方便菩  
薩摩訶薩能成就通達慧根所謂能正滅諸苦是人  
成就是通達慧處處所用皆得離觀捨觀成就隨涅

槃智慧成就是慧根故善知三界皆悉熾然善知三  
界皆爲是苦以是智慧不處三界是人觀擇三界一  
切皆空皆無相無願無生無作無起見出一切有爲  
法道爲具足諸佛法故勤行精進如救頭然是菩薩  
智慧無能沮壞以是通達智慧能出三界亦不依止  
三界斷事一切有爲法中喜一切可染可著繫縛法  
中心不貪嗜於諸五欲心皆厭離心亦不住色無色  
界成就增上智慧成就無量功德猶如大海是智慧  
於一切法方便中無有疑難是人以是智慧通達三  
界於三界中心無所繫得是增上慧故說名慧根得

慧根方便持世何故名之爲根增上義故說名爲根  
不動義故說名爲根無能壞故說名爲根無能退却  
故說名爲根不隨他故說名爲根不退轉故說名爲  
根無能牽故說名爲根隨順正法故說名爲根不貪  
著故說名爲根不雜故說名爲根又復持世諸菩薩  
摩訶薩善知衆生諸根亦能善學分別諸根菩薩知  
染欲衆生諸根知離染欲衆生諸根知瞋恚衆生諸  
根知離瞋恚衆生諸根知愚癡衆生諸根知離愚癡  
衆生諸根知欲墮惡道衆生諸根知欲生人中知欲  
生天上衆生諸根知輕心衆生諸根知上衆生知中

衆生知下衆生諸根知壞敗衆生不壞敗衆生諸根  
知勤修不勤修衆生諸根知巧不巧衆生諸根知有  
罪無罪有垢無垢知瞋礙不瞋礙知隨順不隨順知  
障礙不障礙衆生諸根知欲界行色界無色界行衆  
生諸根知厚善根薄善根知畢定不畢定邪定衆生  
諸根知慳貪離慳貪知戲調不戲調知狂惑不狂惑  
知輕躁不輕躁知瞋恚不忍知柔軟能忍知深厚慳  
知具足施衆生諸根知信者不信者知恭敬者不恭  
敬者知具足持戒知清淨持戒知具足忍辱知懈怠  
知精進知散心知得定知無智慧知有智慧知闇鈍

知不聞鈍知增上慢不增上慢知行正道知行邪道  
知妄念知得念安慧知散根知攝根知壞根不壞根  
知淨根不淨根知明根知發小乘根知發辟支佛乘  
根知諸菩薩根知發佛道根是菩薩得度如是諸根  
分別方便於如是等衆生分別諸根智慧中不隨他  
故說名得諸根方便亦名不爲他牽亦名不可破壞  
亦名不退轉亦名得方便力亦名得人根亦名得諸  
天龍神夜叉乾闥婆阿修羅迦樓羅緊那羅摩睺羅  
伽人非人等根亦名得最自在亦名得不壞不動亦  
名到彼岸者成就如是功德者於一切法中疾得自

在力

持世經卷第三

音釋

幹

古案切  
脊骨也

筋

舉欣切  
骨絡也

褥

如欲切  
衲褥也

沮

慈呂切  
遏也

躁

則到切

安靜也

紹興府山陰縣信官張汝懋男頰董氏法名大  
道孫男張震張陞張維佳玄孫張錦施贊刻  
持世經第三卷  
崇禎丁丑歲二月徑山寂照庵識

持世經卷第四

姚秦三藏法師鳩摩羅什譯

八聖道分品第八

持世何謂菩薩摩訶薩善能知道菩薩摩訶薩安住  
 道中何等為道所謂八聖道分正見正思惟正語正  
 業正命正精進正念正定持世何謂菩薩摩訶薩名  
 為行八聖道分何謂名為得八聖道分方便諸菩薩  
 摩訶薩得正見安住正見為斷一切見故行道為斷  
 一切諸見故安住於道乃至斷涅槃見佛見何以故  
 持世一切諸見皆名邪見乃至涅槃見佛見破壞一

切貪著諸見故名爲正見又無諸見無取諸見不念  
不貪著不緣不行不分別一切諸見是名正見以是  
正見爲見何等見一切世間虛妄顛倒爲諸見所縛  
如是見時名爲安住斷一切見於是正見亦不念不  
見不貪著分別乃至涅槃見佛見爲不起一切見故  
行云何名爲正見一切法寂滅令相不生不滅同於  
涅槃如是亦不念不分別是一切法不念不分別不  
現在前不正不邪不取不捨是名出世間正見何故  
名爲出世間正見是人不得世間不得出世間度世  
間已無所分別是故名爲出世間正見正見者如實

知見世間出世間亦如是是人不復分別是世間是  
出世間斷諸憶想分別名爲出世間正見是人不見  
邪不見正斷一切心所念名爲正見又正見者於諸  
法中更無差別是故說名正見又正見者如實知諸  
邪見義又正見者觀諸邪見卽是平等是名菩薩安  
住正見持世諸菩薩摩訶薩住正見中如實知正思  
惟作是念一切思惟皆爲是邪乃至涅槃思惟佛思  
惟皆是邪思惟何以故斷諸分別名爲正思惟無所  
分別名爲正分別斷分別是正分別何以故是人知  
見一切思惟相已則無有邪是人更不分別是此是

彼住如是正分別中更不得諸分別若正若邪如是  
之人離諸分別過諸分別故說名正思惟正思惟者  
卽是分別知見一切分別皆虛誑不實從顛倒起諸  
分別中無分別是人安住正思惟更不得分別若正  
若邪離諸分別過諸分別斷諸分別故說名正分別  
是人爾時於一切分別中無所繫縛知見諸分別性  
皆平等是名安住正思惟持世諸菩薩摩訶薩勤集  
正語是人見一切語言虛妄不實從顛倒起但憶想  
分別從衆因緣有作是念是語言相語言中不可得  
滅一切語如實知一切口業名爲正語是語言無所

從來去無所至能如是見者名爲正語是人爾時安  
住實相中有所語言皆是正語是故說安住正語中  
得住第一清淨口業亦知見諸口業相亦通達一切  
語言是人所語終不有邪是故說名住於正語持世  
諸菩薩摩訶薩善知一切諸業皆是邪業知一切諸  
業虛妄無所有不作不起何以故諸業中無一決定  
滅一切業名爲正業正業者於業不分別若正若邪  
入諸業平等故不分別業若正若邪是故說名正業  
又正業者則是不繫三界義如實知見義如實平等  
中更無分別是正是邪菩薩行如是正業如實知見

一切業故如實於法無取無捨是故說名行正業正業中無有邪業是人如實知見故說名住是正業中持世何謂諸菩薩摩訶薩善知一切諸命皆是邪命何以故若所有命相法相取相乃至涅槃相佛相乃至清淨佛法相住於是中作清淨命皆名邪命正命者捨諸資生所著斷諸販賣不分別不戲論過一切戲論是名正命正命中更不分別是邪命是正命卽得一切清淨命是故說名得清淨正命又一切諸命皆不生無有邪正是人名爲得清淨命安住正道無有戲論住是正命中不取正命不捨邪命是故說名

住正命中是人爾時不名住正不名住邪得清淨平等命離於命相無動無作不念命不念非命但名爲如實知者如實見者是故說名住正命中持世何謂諸菩薩摩訶薩善知正精進菩薩摩訶薩住正精進若菩薩爲斷一切精進道故名爲住正精進何以故一切精進皆爲是邪諸有所發有作有行皆名爲邪何以故一切法皆是邪作有所發作皆是虛妄若虛妄者卽亦是邪正精進者無發無作無行無願一切法中斷有所作是菩薩於一切法中斷有所作乃至涅槃相佛相中不生有所作相是人善知一切所作

皆爲虛妄爲無所作故行道若是正者則無所作一切法平等無差別無有所作過所作相是菩薩善知精進非是精進道不取不捨故說名任正精進正精進者卽是諸精進不可得義卽是諸法如實知見義所謂正精進如是見者不復分別是邪精進是正精進是故說名正精進持世何謂諸菩薩摩訶薩善知正念諸菩薩摩訶薩知見一切念皆是邪念凡有念處皆是邪念何以故一切念是邪念若於處所念生皆是邪念無憶無念是名正念何以故一切念從虛妄因緣起是故所有生念處皆爲邪念若於處所無

生無滅是名正念無有處所起念業是名安住清淨念中更無處生邪念是人知見一切法皆爲是邪是正法中無念是故說安住正念中又正念者於法無有分別是正念是邪念是人通達一切念皆無念相常行六捨心故說名住正念是人更無所貪樂亦不分別是無念以諸法平等通達一切念是人如實知見一切念故若念若非念無取無捨是故說安住正念中是人所念更不復分別是等是不等於念非念不隨不緣以無緣故知一切念非念若念若非念不復枉心是人安住正念故不可示不可說斷一切語

言離一切語言如實知一切語言不分別此彼故說  
名安住正念持世何謂諸菩薩摩訶薩安住正定諸  
菩薩摩訶薩觀一切諸定皆是邪定何以故凡諸法  
中所取緣定相所取知定相所取三昧戲論定相皆  
名是邪邪者卽是貪著義是定不爾如所緣取相不  
取相無法無戲論無憶念名爲正定若不貪著不分  
別此彼斷貪著喜不受定味壞取定相心無所住是  
名正定又正定者不依止一切定相而不戲論如實  
通達法之本體善知定相心不貪著欲破彼此念道  
如是語亦不分別斷一切分別故名爲正定又正定

中更不生邪正想破一切想斷一切想滅一切想故  
名爲正定正定者不生邪正不分別邪正是名正定  
何以故是菩薩通達諸定方便住是正定中不復爲  
若定若定相所繫過諸定相故說名正定正定名於  
法無所戲論諸法平等中無有戲論所謂是正是邪  
正定者卽是諸法平等義正定者能出諸禪定諸三  
界一切有爲法能如實知見一切五道生歿義持世  
是名諸菩薩摩訶薩住如是定中名爲得正定方便  
名爲善知道善知道方便所謂如實知見能至涅槃  
道

世間出世間品第九

持世何謂菩薩摩訶薩善知世間出世間法何謂得世間出世間法方便持世諸菩薩摩訶薩正觀世間出世間法何等爲世間法何等爲出世間法菩薩作是念凡所有法憶想分別從顛倒起衆因緣生繫虛妄緣從二相起空無所有如虹雜色亦如火輪誑於凡夫破壞義故假名世間是故名世間是諸世間法皆非是實從虛妄緣起無作無起相但因陰界入色聲香味觸法故說因名色故說隨凡夫人心所貪著又隨種種貪著邪見如亂絲無緒如茅根蔓草互相

連著隨顛倒相應故說名世間法何等爲出世間法如是世間法從本已來如實性離是名出世間何以故智者求世間法不可得求出世間法不可得無世間出世間處是中無分別是世間是出世間但爲世間故說出世間世間實相卽是出世間何以故世間無定相可得世間相從本已來常空世間法不決定故世間從本已來是寂滅相是菩薩如是觀世間出世間不可得世間亦不貪著出世間是人一念不著世間出世間故不與世間諍訟何以故智者通達世間是虛妄相見世間實相故更不分別是世間是出

世間何以故持世世間者即是五受陰義一切世間法皆攝在中智者求覓陰不得陰不得陰性不得陰來處不得住處不得去處可無五陰十二入十八性無分別無名字無性無相無行即名出世間持世諸菩薩觀世間出世間法時不見世間法與出世間合不見出世間離世間是不離世間見出世間亦不離出世間見世間是人不復緣於二行所謂是世間是出世間何以故持世世間如實相即是出世間世間中世間相不可得世間法中世間法不可得以無所有故通達是法即是出世間持世若世間與出世

間異者諸佛不出於世諸佛亦不說一切世間不可得一切世間不生如實知見一切世間持世若不得世間不取世間即是出世間是故當知如實知見世間通達世間不可得故即說出世間是故諸佛出於世間一切諸法若世間若出世間以不二不分別證如實知見故即是說出世間法持世如是世間甚深難可得底依世間法者得世間法者希望出世間法者於世俗語生第一義者住在二法者不能得入如是法中何以故是人不知世間不知出世間是皆行二法者持世行二法者不能通達世間出世間持世

諸菩薩摩訶薩如是善知世間出世間法亦得世間  
出世間法方便

有爲無爲法品第十

持世何謂菩薩摩訶薩善知有爲無爲法得有爲無  
爲法方便持世諸菩薩摩訶薩正觀擇有爲無爲法  
云何爲正觀擇是有爲法無有作者無有受者是有  
爲法自生自墮數中是故名有爲法是有爲法以虛  
妄因緣和合行云何爲行自墮數中以二相緣知故  
名有爲法生是法無有作者無使作者是法自生無  
能起作者是故說名有爲是諸有爲法不在內不在

外不在中間不合不散從虛妄根本分別起無明因  
緣故皆無所有但以諸行力故有用是法無有作者  
無有起者是名有爲有爲者卽是繫相義隨凡夫顛  
倒所貪著說智者通達是中不得有爲法不得有爲  
所攝法智者所不數故名有爲法何以故智者不得  
有爲分別爲凡夫世俗假名故分別是有爲賢聖不  
墮一切諸法名數諸賢聖離諸法名數是故說得無  
爲者名爲賢聖智者通達一切有爲皆是無爲是故  
不復起作諸業智者知見一切有爲法起相虛誑妄  
想是故不復起作有爲何以故有爲法無有定性一

一切有爲法皆無性無起作何以故持世無有行有爲緣而能通達無爲通達無爲者更不復緣有爲云何爲通達智者見一切有爲法有虛妄無有根本無所繫屬不墮數中如是觀時不復貪著有爲緣亦不取有爲法何以故持世非離有爲得無爲非離無爲得有爲有爲如實相卽名無爲何以故有爲中無有爲無爲中無無爲但爲顛倒相應衆生令知見有爲性故分別說是有爲法是無爲法是有爲相是無爲相於是中何等爲有爲相謂生滅住異何等爲無爲相所謂無生無滅無住異是有爲相無爲相但爲引導

凡夫故說持世有爲法無生相無滅相無住異相無相是故說生滅住異相若是有爲法定有三相佛當決定說如是相是生如是相是滅如是相是住異持世如來說一切法皆是無相持世無生若當有相無滅若當有相無住異若當有相佛應決定說是無爲相持世若無爲有相有說卽非無爲以說相故但凡夫以數法故說有爲三相所謂生滅住異無爲三相所謂無生無滅無住異持世若人通達知見有爲無爲法是人更不復有生滅住異是故說得無爲者持世生滅者卽是知見集沒義若法無集則無有沒若

不起集則不有退亦無住異持世是名有爲如實知見若人如實知見有爲則不墮數中所謂生滅住異菩薩如是思惟有爲無爲法不見有爲法與無爲法合亦不見無爲法與有爲法合但作是念有爲法如實相卽是無爲則更不復有所分別若不分別有爲無爲法卽是無爲法若分別是有爲是無爲則不能通達無爲斷一切分別是名通達無爲如實通達緣性斷諸緣故不在數不在非數持世是名諸菩薩摩訶薩有爲無爲法方便所謂於諸法無所住無所繫亦不貪受若有爲法若無爲法

本事品第十一

持世若諸菩薩摩訶薩能如是善知五陰善知十八性善知十二入善知十二因緣善知四念處善知五根善知八聖道分善知世間出世間法善知有爲無爲法當得善知諸法實相亦善分別諸法之相亦得念力亦得善分別一切法章句慧亦得轉身成就不斷念乃至得阿耨多羅三藐三菩提持世過去無量阿僧祇劫爾時有佛號閻浮檀金須彌山王如來應供正遍知明行足善逝世間解無上士調御丈夫天人師佛世尊持世是閻浮檀金須彌山王佛壽命五

劫有無量聲聞衆其佛國土清淨嚴飾豐樂安隱其  
諸衆生具足快樂少於貪欲瞋恚愚癡易化易度易  
淨持世是閻浮檀金須彌山王佛爲諸菩薩亦說是  
斷衆生疑菩薩藏經持世時有菩薩名曰寶光聞是  
陰界入緣四念處五根八聖道分世間出世間有爲  
無爲法方便卽時發於精進二十億歲終不生惡心  
若貪欲若瞋恚若愚癡若利養若飲食若衣鉢但爲  
入如是法方便門故常勤精進持世是寶光菩薩於  
閻浮檀金須彌山王佛所盡其形壽常修梵行命終  
之後還生其佛國土人中年少夭命卽復還生於其

佛所修行梵行於一一劫五百生歿最後生閻浮檀  
金須彌山王佛欲涅槃時在第五劫成就如是多聞  
法亦得如是諸法實相方便所從佛聞諸法皆能憶  
念得如是念力故白佛言聽我廣演諸法卽於其世  
中度脫無量無邊衆生令住阿耨多羅三藐三菩提  
道中是閻浮檀金須彌山王佛入涅槃時爲持法故  
護念寶光菩薩佛滅度後法住一劫是人於是一劫  
五百世中常生人間出家學道亦常於是諸法實相  
得疾增長亦復利益無量無邊衆生持世是寶光菩  
薩如是展轉得值萬億諸佛末後世無量明佛爲其

授記過阿僧祇劫當得阿耨多羅三藐三菩提於阿  
僧祇劫中更值百千萬億那由他諸佛後得阿耨多  
羅三藐三菩提成佛號一切義決定莊嚴如來應供  
正遍知明行足善逝世間解無上士調御丈夫天人  
師佛世尊有無量無邊阿僧祇菩薩衆無量聲聞僧  
佛壽二劫其佛國土豐樂安隱普皆莊嚴持世是故  
菩薩若欲得如是法中善知方便當勤行精進勤求  
讀誦修習如是之法又復諸菩薩摩訶薩欲得如是  
諸法方便故於四法中勤行精進何等爲四一者出  
家二者獨行三者持戒清淨四者除懈怠心是爲四

諸菩薩有是四法勤求多聞安住忍辱當疾得值遇  
四法何等四一者生中閻浮提二者得值佛三者隨  
法行四者除罪業障是爲四又復持世諸菩薩摩訶  
薩如是法中勤行精進當得清淨布施力清淨持戒  
清淨忍辱清淨精進清淨禪定清淨智慧力諸菩薩  
摩訶薩住是法中疾得如是方便力又持世菩薩摩  
訶薩雖行頭陀細法亦能常於衆生有大悲心是人  
入大悲心於是法方便中勤行精進持世復有諸菩  
薩摩訶薩欲得如是法當入諸陀羅尼門勤行精進  
何謂入陀羅尼門故勤行精進所謂善觀一切諸法

無量緣觀一切無量方便亦觀無量方便起如是觀  
時以三昧門方便善入諸法門無量緣亦入無量緣  
方便亦入無量方便起於是法中得力故能善知諸  
法實相亦善分別諸法之相亦得念力亦得善分別  
一切法章句慧亦得轉身成就不斷念不退法乃至  
得阿耨多羅三藐三菩提又復持世諸菩薩摩訶薩  
入諸陀羅尼門故通達一切諸法隨宜因緣以一因  
緣能入千種因緣隨智慧力得諸法方便又復持世  
諸菩薩摩訶薩如是法中勤精進故入一相門三昧  
得一相門三昧故入無量相門三昧如是入已以種

種因緣方便故能入是諸法門如是諸菩薩入一切  
諸法門已當得一切諸法方便又復持世諸菩薩摩  
訶薩多行智慧故當善知諸禪定相亦善知無緣三  
昧是三昧力方便故能善知無量緣無量禪定起是  
菩薩住此地中能得一切諸法實相方便又復持世  
諸菩薩摩訶薩常觀世間緣方便常觀有爲法緣方  
便常觀世諦緣方便亦常勤行壞散一切法緣方便  
亦無貪著處菩薩修習如是法疾得一切諸法實相  
方便又復持世諸菩薩摩訶薩勤行精進起方便力  
而亦常觀諸法實相不依止世樂亦不雜行世間之

法成就如是法者疾得諸法實相亦善分別諸法之  
相亦得念力亦得善分別一切法文辭章句慧亦得  
轉身成就不斷念乃至得阿耨多羅三藐三菩提持  
世是故諸菩薩摩訶薩欲得度如是諸法彼岸當於  
是法如說修行持世汝等於是法中勤行精進汝等  
不久當於此法得無礙智慧持世過去無量無邊不  
可思議阿僧祇劫爾時有佛號無量光德高王如來  
應供正遍知明行足善逝世間解無上士調御丈夫  
天人師佛世尊是無量光德高王佛壽命一劫其佛  
國土以七寶網羅覆其上普以七寶諸多羅樹莊嚴

世界是諸多羅樹亦復以七寶網羅覆其上一一樹  
下敷師子座諸多羅樹皆出天衣諸座皆以瑠璃寶  
闍浮檀金赤真珠所成諸多羅樹四邊皆有香樹華  
樹圍遶莊嚴一一樹下各各有池八功德水充滿其  
中諸池皆以玻璃磚磔赤真珠所成諸池水上皆有  
青赤白紅蓮華遍覆水上諸池皆以七寶爲欄楯持  
世彼佛國土皆以如是衆寶莊嚴世界四邊復有寶  
樹如忉利天波耶多羅迦拘毗陀羅樹如是寶樹千  
萬億數圍遶世界是諸寶樹光明障蔽一切日月光  
明不復現持世諸多羅樹及諸寶網自然皆出種種

妙音如天妓女歌頌之聲其佛國土常出如是微妙  
音聲無三惡道亦無三惡道名持世是無量光德高  
王佛爲諸衆生多說如是之法所謂般若波羅蜜及  
菩薩藏斷一切衆生疑喜一切衆生心經持世其無  
量光德高王佛說法時一日之中無量百千萬億衆  
生發阿耨多羅三藐三菩提心已發心者皆得具足  
助菩提法持世是無量光德高王佛如是因緣教化  
成就無量無邊衆生於阿耨多羅三藐三菩提其佛  
國土菩薩摩訶薩其數甚多持世彼佛滅後法住半  
劫是無量光德高王佛滅度之後法欲盡時下方過

千佛世界有菩薩名無量意命終來生始年十六出  
家學道於無量光德高王佛法欲滅時聞是諸菩薩  
摩訶薩解說陰界入方便經是無量意菩薩聞此經  
已發大精進於是法中盡到其邊成就深方便力是  
菩薩善根因緣故於彼命終得值二十億佛皆得成  
就如是之法常識宿命童真出家修行梵行常得念  
力世世不離如是之法世世成就不斷念然後得成  
阿耨多羅三藐三菩提號無量光莊嚴王佛持世是  
故諸菩薩摩訶薩若欲疾得阿耨多羅三藐三菩提  
若欲疾得具足一切智慧於我滅後後五百歲惡世

之中當勤護持發大誓願應生大欲大精進大不放  
逸於後世中常當護持如是等經爾時跋陀婆羅伽  
羅訶達多菩薩等爲上首從座而起向佛合掌白佛  
言世尊我等於佛滅後後五百歲法欲滅時我等當  
爲守護如是等經勤行精進讀誦聽受亦當復爲他  
人廣說復有若干千數菩薩從座而起合掌向佛瞻  
仰尊顏發是願言世尊我等後世後五百歲作是誓  
願於如是等甚深無染汙諸佛所聽能生菩薩諸善  
功德能具足諸菩薩助菩提法我等當其護持聞如  
是法當大清淨其心歡喜專意勤求受持讀誦佛便

微笑卽時三千大千世界無量光明遍滿其中三千  
大千世界六種震動爾時阿難從座而起偏袒右肩  
右膝著地合掌白佛言世尊何因緣故今者微笑地  
大震動佛告阿難汝見此等菩薩發大誓願後世護  
持如是甚深無染汙法不阿難是諸菩薩非但今世  
發是誓願阿難我念是諸菩薩於無量無邊諸佛所  
發如是誓願三時護持諸佛之法亦能利益無量衆  
生今者亦復三時護持我法於今現在及我滅後法  
欲滅時後末世中亦大利益無量衆生持世如跋陀  
婆羅等三時護持我法亦復於此賢劫之中三時護

持諸佛之法亦於未來諸佛所三時護持如是之法  
阿難我今讚說是人成就如是無量功德說不可盡  
憐愍利益安隱衆生阿難若我悉說是人如是功德  
人不能信若人不信佛語是人長夜失於利樂受諸  
苦惱墜墮惡趣阿難我今麤說是等菩薩利益衆生  
假使如三千大千世界滿中衆生皆墮天地獄中  
有一人語諸衆生汝等莫怖我今一一代汝受此大  
地獄苦是人卽時出地獄衆生一一皆爲多千萬歲  
受地獄苦阿難於汝意云何是人爲大利益大安樂  
不阿難言世尊爲大利益爲大安樂阿難是人出諸

衆生已現其勢力皆使令得成就世間第一快樂阿  
難是人爲能有恩能與衆生樂不阿難言世尊是人  
所益非言所說阿難我今實說是跋陀婆羅伽羅訶  
達多菩薩等利益衆生是人利益衆生此二利益安  
隱之事以筭數譬喻不可爲比何以故阿難是人樂  
具皆是有爲相違之法不爲狀足故不爲離欲故不  
爲智慧故不爲沙門果故不爲涅槃故阿難是諸菩  
薩等利益衆生與無上樂一切智人樂爲求佛道者  
皆作佛事未入正位者令得聲聞辟支佛地以佛法  
化諸菩薩示教利喜阿難是諸菩薩能示教利喜諸

菩薩衆爲不斷佛種故爲守護一切智種故住於世間阿難是人過去行菩薩道時無量百千萬億那由他劫皆使有佛不令斷絕亦於未來無量百千萬那由他劫皆使有佛亦不斷絕何以故阿難是諸菩薩本行菩薩道時已令無量諸佛住於佛道是諸菩薩世世護持教化成就百千萬億諸佛皆使成阿耨多羅三藐三菩提從是已後亦復教化無數百千萬億衆生令住佛道教化力故具足佛法亦皆當得阿耨多羅三藐三菩提阿難是故跋陀婆羅等爲與衆生佛樂一切智慧樂故勤行精進阿難若人實說何等

是諸菩薩父母救舍依洲生諸菩薩當說是跋陀婆羅伽羅訶達多等五百菩薩阿難若人實問何等是菩薩種當言跋陀婆羅伽羅訶達多等五百人是如是善男子等爲不斷佛種不斷一切智慧種故住於世間是善男子等亦於後世後五百歲以是教化方便力故以樂因緣令諸衆生不墮三惡道中亦令無量百千衆生住菩薩乘阿難若干千佛說是善男子等功德不可得盡何以故是善男子等成就如是等不可思議功德阿難我於無量百千萬億阿僧祇劫所集法藏是善男子等能受護持阿難我今以是無

量億劫所集法寶囑累是人善男子等爲無量阿  
僧祇國中現存諸佛之所護念阿難是善男子等  
一切天人世間所應禮事阿難是人十方千佛講說  
法時常所讚歎阿難我已印可爲斷一切衆生疑故  
若人於後末世受持是經讀誦通利爲人廣說當知  
是善男子善女人近一切種智有人於後末世乃至  
得聞如是深法信解而發誓願我皆與授阿耨多羅  
三藐三菩提記若於後世後五百歲生信解心勤行  
精進護持是經是善男子善女人我今亦以是阿耨  
多羅三藐三菩提法而囑累之若聲聞人信受如是

深法心無違逆我與授記後當得值彌勒佛會若求  
佛道者聞如是法受持信解是人皆爲彌勒佛所授  
記以本願故出家學道阿難當知是善男子善女人  
等若於後世後五百歲時於是法中勤行精進當知  
是人善根猛利

囑累品第十二

爾時持世菩薩摩訶薩白佛言世尊惟願利益諸菩  
薩摩訶薩故護念是經諸菩薩摩訶薩若於後世得  
聞是法心淨喜樂亦爲具足如是法故勤行精進爾  
時世尊護念是經卽以神力令此三千大千世界香

氣遍滿所未曾有一切衆生慈心相向佛護念已告持世菩薩持世我今護念是法印品經斷一切疑故持世若有能受持讀誦是經者不久當得一切智慧惟除本願我今亦與是人授記疾得具足一切智慧故持世諸菩薩摩訶薩若受持讀誦是法印經思惟廣爲人說是人不久當疾得五陰方便十二入十八界十二因緣四念處五根八聖道分世間出世間法有爲無爲法方便亦疾得諸法實相亦疾得分別諸法之相亦疾得念力亦疾得善分別一切章句慧亦疾得轉身成就不斷念乃至得阿耨多羅三藐三菩

提持世是經後世能與衆生作大法明大智慧光福德因緣亦能與諸菩薩具足助阿耨多羅三藐三菩提法持世若諸菩薩於後末世時得值是經及餘深經菩薩藏所攝與諸波羅密相應是人不爲魔事所覆業障所惱持世若是人未得無生法忍者我與授記於當來世第二第三佛當得無生法忍已得無生法忍者於一切法中疾得自在力疾得淨佛國土疾得無量聲聞衆疾得無量菩薩衆持世我今說是法印爲斷後世一切疑故持世諸菩薩摩訶薩見四利故於後末世護持如是等經而發誓願何等爲四諸

菩薩作是念我當疾得無量無邊功德又令衆生  
大善根亦爲諸佛護持正法亦作諸佛持法藏人亦  
爲無量諸佛所見讚歎是名四持世諸菩薩摩訶薩  
復見四利於後末世護持是經而發誓願何等爲四  
諸菩薩作是念我等於後恐怖惡世守護法故當行  
大精進於後惡世正法壞時能持法藏爲此難事於  
後惡世法亂衆生亂時我等守護法故其心不亂爾  
時當得具足忍辱以無瞋道守護於法是名四持世  
諸菩薩摩訶薩見是四利故於後惡世護持如是等  
深經而發誓願跋陀婆羅伽羅訶達多等五百菩薩

及餘菩薩得聞是法印經佛前合掌於後惡世發願  
護持是深法者佛以右手皆摩其頭作如是言諸善  
男子我於無量阿僧祇劫所集阿耨多羅三藐三菩  
提大法寶藏甚爲難集受諸無量無邊憂悲苦惱亦  
捨無量無邊歡喜快樂今以囑累汝等於後末世當  
以是無量劫所集法藏善開與人廣爲四衆分別解  
說此正法種令不敗壞汝等還當然大法炬諸善男  
子如來今者請汝等佛子住佛所住我於是無量百  
千萬億阿僧祇劫所集法寶藏爲諸天人廣宣流布  
卽時跋陀婆羅伽羅訶達多等卽禮佛足作是言我

等隨力所能亦承佛威神當於後世廣宣流布是法  
 寶藏說是法印經時無量無邊阿僧祇一生諸菩薩  
 善根成就亦有無量百千萬億衆生發阿耨多羅三  
 藐三菩提心畢定受阿耨多羅三藐三菩提記佛說  
 是經已持世菩薩及跋陀婆羅伽羅訶達多等及餘  
 菩薩并諸四衆一切天人阿修羅等聞佛所說皆大  
 歡喜

持世經卷第四

音釋

緒徐呂切蔓無取切蔓  
絲端也蔓不斷宛



經興府山陰縣信官張汝懋男頰董氏法名大  
 道孫男張震張陞張維佳玄孫張錦施貴刻  
 持世經第四卷  
 崇禎丁丑歲二月徑山寂照菴識



上  
廿六